

清史列傳



清史列傳 卷四十七

大臣畫一傳檔後編二

沈兆霖

沈兆霖浙江錢塘人道光十六年進士改翰林院庶吉士十八年散館授編修十九年二月大考二等賜文綺五月充雲南鄉試副考官二十年五月充四川鄉試正考官八月提督陝甘學政二十五年陞國子監司業二十六年七月陞翰林院侍講八月命在上書房行走授惇郡王讀二十七年大考翰詹奉旨免考試五月充日講起居注官咸安宮總裁二十九年四月陞侍講學士閏四月命在南書房行走咸豐元年六月充江西鄉試正考官旋陞詹事府詹事十月充順天武鄉試副考官十二月授內閣學士兼禮部侍郎銜充文淵閣直閣事二年正月稽察中書科事務二月充各直省鄉試覆試閱卷大臣三月署兵部右侍郎旋補吏部右侍郎歷充考試試差散館閱卷大臣殿試讀卷官六月充江南鄉試正考官八月提督江西學政三年廣西會匪自湖北擾及江西九江遂撲南昌六月兆霖奏請

速撥援兵以保省會上嘉之八月遵旨查明賊匪滋擾情形並請飭各路團練保衛城池略言江西省垣雖可無虞賊窮四竄必擾外府省兵勢難兼顧分兵少仍不敷堵截分兵多則根本空虛外府團練衆多若肯齊心協力何藉分兵卽如撫州各鄉團不下數萬皆留保本村不肯守隘守城官兵祇三百已經都司成善帶赴省城若團練再不出力賊至何以守禦其故皆因堅壁清野舊議祇守本村並不出戰不知此次賊匪與嘉慶年間川楚教匪不同川楚之匪劫掠村莊自以堅守堡寨爲是今賊專攻省會郡縣城池若但保本村置城垣於不問城旣失鄉勇亦相與解散矣撫州如此各府各省亦必皆然伏乞皇上通飭直省辦團練之紳士均須於練勇中精選十之二三聯爲鄉兵公舉練達有位望之人分統遇本縣有警各相救援不得株守本村以防土匪爲詞其外府外縣仍不得調往戰守以免擾累疏入得旨允行十二月因病奏請開缺五年四月病痊五月署吏部左侍郎命仍在南書房行走時皖南軍需孔棘兆霖奏言皖省在江北者安慶廬州鳳陽潁州四府六安滁和泗四州在江南者池州太平徽州寧國四府廣德一州而安慶以省會居南北之中故能控制今則江北之安廬和江南之池太皆爲賊踞

皖撫駐營尙在廬城東北徽寧廣三屬距撫臣駐紮之所中隔池太安廬和五屬之地文書往返必經江蘇浙江兩省動輒月餘故徽寧廣雖隸安徽幾爲撫臣號令所不及事急則向浙江請餉事平則泄沓如前不加整頓官吏之賢否皖撫不及知浙撫雖知之而無黜陟之柄兼之浙省派往兵勇主客各存意見不肯協力守禦本年杭州府知府徐榮戰歿實由於此所以旋收旋失糜餉殃民而無已也伏查徽寧二府地皆可守山川險固民亦健奮徽屬之歙休二縣殷戶尤多果能撫馭得宜與紳民聯爲一氣賊斷不敢屢屢窺伺以臣愚見莫如於皖南設一大員使之專轄四府一州庶足以飭吏治而固民心權有專屬令可必行府縣有所稟承士民得所歸向內可度地險以設防外可奮兵威以協剿皖撫得以專心於江北浙撫不至牽制於皖南疏入下王大臣吏兵部集議尋議改池太道爲皖南道准專摺奏事如福建臺灣道例從之七月署工部右侍郎兼管錢法堂事務九月兼署兵部右侍郎十月充順天武鄉試較射大臣十二月復充文淵閣直閣事六年正月補吏部右侍郎四月充會試覆試朝考閱卷大臣五月因倡率寶源局監督捐貲修葺新舊兩局下部議敘十月調補工部右侍郎兼管錢法堂事務

十一月調補戶部左侍郎兼管三庫事務十二月充經筵講官八年九月順天科場一案上命兆霖偕尙書全慶等覆勘試卷勘出應辦應議者數卷歸案訊治十一月命往通州會同倉場侍郎盤查通濟庫查出咸豐二年冬至本年冬共動借銀二十五萬六千一百兩皆係經紀長支奏請照三年清查舊案廳員分賠四成經紀分賠六成並籌議補救章程四條一兌漕銀兩宜另款籌畫一動借銀兩宜奏明辦理一奏銷冊存數宜歸覈實一庫中放款宜候批發給下所司議行又准所請照戶部三庫例嗣後倉場侍郎加兼管通濟庫事務銜通濟庫印鑰由該侍郎佩帶遇有放款親往監放如遇必須長支准該侍郎隨時奏明歲不過一萬兩著爲令九年正月遵查舊太倉徵變米石揀出潔米一萬一千八百餘石尙堪食用次米六千三百餘石請作正開放其不堪食用米四千五百餘石責令花戶賠補從之二月充會試副考官五月擢都察院左都御史八月充宗室舉人覆試考試孝廉方正閱卷大臣九月充武會試正考官先是工部寶源局監督張仁政畏罪自盡上命兆霖查辦究出監督等有得受炭商錢文情弊奏請將舊監督瑞琇等褫職治罪如律十一月賜紫禁城騎馬十年三月署戶部尙書四月歷充宗室

會試覆試散館朝考閱卷大臣殿試讀卷官七月英吉利內犯八月兆霖奏云竊英人自八年抵天津後疊次構釁歷年辦理未協彜情至本年七月間竟由天津內犯大言恐嚇要求無已皇上明降諭旨歷數數年英人罪狀大伸天討中外臣民同聲稱快惟英軍雖不滿萬餘而火器勝於中國能及遠而有準然臨陣者果能奮勇無前毫無畏葸卽有所傷而以我之衆乘彼之寡亦不難於殲滅惟見在火器難禦之成見先入爲主則氣已稍挫儻毫無把握輕於一試設一撓敗必至不能復振故臣以爲當今之計宜以緩攻堅持爲主先飭直隸總督恆福並督辦民團之焦祐瀛張之萬以督標之兵本地之勇時時擾其海口之船再飭天津府知府石贊清與焦祐瀛張之萬協辦團練石贊清膽識兼備久得民心團練必能奏效或殺其酋或焚其船使之兼顧海口不能驟進卽進亦必留勁卒守船此所謂攻其所必救也僧格林沁八里橋之兵及瑞麟勝保統帶各隊須相隔前後一二十里分作三處紮開使緊相呼應以爲犄角之勢皆宜深溝高壘勿輕與戰嚴爲之備使敵至不能驟拔若奉調各路之兵陸續而來亦飭令分擇要地紮住俾由通至津處處能聯絡接應而深林隈隱之處又多設旌旗鼓角使之動生疑畏

正兵厚集其勢持重養威而以奇兵乘其敝復以疑兵惑其心彼種種牽掣必將徘徊而不敢進於是密拏奸細以防其叵測嚴斷接濟以絕其餉源與之相持一月有餘而朔風大作海口將冰度其所帶之餉亦將罄盡自必急圖遁歸矣昔周亞夫堅壁不戰人以爲懦而卒破七國正此計也臣又聞英人所倚爲謀主者惟巴夏里一人前此擄去葉名琛亦係此人之計餘如額爾金噶囉等皆不能畫策今巴夏里就擒敵已失其所恃必將設法索回據國法言之自應卽予誅磔何煩再計然敵之勢本利在速戰若卽行誅戮恐奮兵深入其勢益銳莫若暫且牢固監禁有照會與彼卽告以英兵前進先斬此人使之繫望生還而不敢銳舉輕進儻彼詭言放回此人卽便受撫務祈乾斷獨伸勿爲浮議所惑總須令其兵船全數退出海口悉照八年所定各款立定和約一款不增然後允予加恩釋放仍不准原船帶回改由陸路押解上海交還方爲穩妥否則英人素以和議誘我一爲所誘此人釋回仇我必甚其設計必更毒於前矣又奏云臣思數年辦理洋務諸臣皆一味遷就希圖了事英人不知聖恩寬大以爲我實懼彼於是百計要求得步進步遂至不可收拾今旣聲罪致討便當專講守禦之法勿汲汲於言撫忽討



忽撫持議兩端而將士之心不堅卽議撫者亦無從措手矣故持久以困之多方以誤之爲目前之至計而撫之一說勿再來雜見在英人暫留不進必又將以撫誘我實則懈我軍心而彼因得以肆其詭詐臣愚以爲此次辦法戰宜緩不可遽求倖勝撫更宜緩不必急圖息事而壁壘如何堅固聲援如何聯絡如何先占地勢使彼不能銳進如何豫防火器使彼不能撲營全在統兵大臣熟籌而速計之總之詔旨旣下英人必且震懾天威而又獲其謀事之人祇宜靜以制之緩以俟之當有轉機順其自然之勢而無懼無迫弗使辦法有一毫紊亂則洋務不難大定矣未幾又奏言竊自古馭外之道皆務懷柔不矜遠略誠以勝之不武不肯疲中國而結怨四夷也然偶爾犯順擾及邊陲撻伐膺懲亦所不諱本年三月俄美英法四國之船駛至天津要求多欸皇上聖度如天專以安民輯兵爲務疊命大臣前往議撫所請各條奉恩允者已十之七八中惟領事駐京內江通商兩事關係最鉅駐京則入據腹心朝政動多牽制內江則奪我關隘長江無可設防議者欲撫事之速成謂不妨依違應允再圖日後熟商不知國家所以威服遠人首重誠信與其責言於異日不如慎諾於此時且所許已多當不至因此二條遽至決

裂並求明降璽書將此二條萬難應允之故反復曉諭推至誠以宣示杜非分之  
干求彼等誦此皇言自然信服必不再以蒙蔽見疑即使仍前狡詐竟起爭端則  
釁自彼開便當儘力殲除俾知畏懼雖勝負原難豫定而權主客之勢彼軍已入  
重地審衆寡之數彼兵不過數千且彼所長者礮耳若絮屏藤牌及屢伏屢進皆  
避礮之良法可使衆軍勤加演習人人有恃無恐膽氣日壯然後進而攻其所短  
彼短於夜戰我卽潛師以乘之於暗彼短於技擊我卽疾趨而迫之於近齊之以  
軍律激之以忠義勵之以重賞直前而義不反顧小挫而氣不少衰如此而勝算  
在我當亦無堅不摧矣且夫兵不厭詐取其克敵而已聞此時津人各懷義憤中  
有練勇二千人皆敢死之士屢請於官願效死力官以恐撓撫局頻加禁遏臣愚  
以爲若竟用兵則僧格林沁所統各軍自當進剿一面密飭譚廷襄陰諭練勇出  
其不意進薄洋船短兵截擊奪其船者全船充賞事後勇首給予議敘各勇仍加  
賞賚使英人跋前疐後兩面受敵雖欲久留不可得矣從而議撫撫亦易矣若必  
過爲顧慮懼啟兵戎並駐京內江二條暫時允許恐其欲無厭日後朝中之虛實  
盡知江路之往來益熟禍有不可勝言者彼時之用兵更難於今十倍可不爲之

遠慮哉九月補兵部尙書時撫議成上猶駐蹕木蘭兆霖偕同官奏請回鑾得旨俟明年再降諭旨十一月復奏云竊本年八月因洋務未定皇上暫幸熱河以爲集兵控制之計在廷諸臣皆知當時情勢不得不然九月中英法兩國均已換約二十七日聯軍退盡廷臣合詞奏請回鑾奉上諭本年天氣漸屆嚴寒朕擬暫緩回鑾俟明歲再降諭旨欽此又准軍機大臣字寄十一月初一日奉上諭此次外人稱兵犯順恭親王奕訢等與之議撫雖已換約然退兵後各國尙有首領駐京者且親遞國書一節旣未與彼等言明難保不因朕回鑾再來饒舌該王大臣奏請回鑾係爲鎮定人心起見然反覆籌思祇顧目前之虛名而貽無窮之後患朕擬本年暫緩回鑾俟洋務大定再將回鑾一切事宜辦理本年回鑾之舉該王大臣等不准再行瀆請等因欽此臣等跪讀之下仰見皇上計深慮遠籌及萬全之至意惟本年回鑾何敢多瀆而統籌國勢有不忍緘默不言者謹就臣管見所及詳悉陳之夫聖駕之暫幸熱河與暫緩回鑾皆因洋務未定起見臣雖未與聞撫議而換約時臣在城內親見其事竊謂外兵雖衆而強其意不過藉以脅和並無利我疆土之志也八月二十九日聯軍入城時臣遣人往觀兵約萬人薄城而上

其氛甚惡九月十一日英國換約自安定門至禮部門外綿亙十餘里步步爲營約萬餘人器甲精嚴居民皆閉戶不出如有異志則此二日已可占據都城爲所欲爲矣換約之時臣細窺額爾金等面容皆懷疑懼知外人未必不畏我密謀故嚴爲設備並非別有意計也至十二日法國換約則便覺坦易禮部門外至安定門並無一兵惟禮部門內羅列千餘人自衛而已計開城至退兵共十九日彼軍未傷一人未毀一屋故此大外人內擾我國之虛實固爲外人窺破而外人之虛實亦爲我國窺破夫以萬餘衆入城而仍換約而去全城無恙則彼等之專於牟利並無他圖已可深信其親遞國書一節臣私心揣度亦可姑允所請撫慰數言總期不損國體不拂彼情斷無意外之患竊思外人雖非我族類果能示以誠信尙易羈縻且通商一層本與中國兩有利益所慮者以通商爲名而志在土地人民耳就今日之情勢論之危至於擁兵入城尙不足慮此後豈有再重於此者乎彼處漢奸雖多此時爲彼設計亦祇在要求圖利一邊臣愚竊以爲外人不足慮也至中外大計則可慮者極多京兵不可用宜如何訓練粵捻久未平宜如何議剿庫藏空虛宜如何豫備南漕不繼宜如何採買其事皆較洋務爲鉅亦較洋務

爲難熱河距京不甚遠誠如聖諭與在京無異而皇上不在城內各署事件雖亦照常辦理不至曠誤久之亦恐敷衍具文漸臻疲玩蓋進則無所稟承而退則無所警畏也況京師見聞尙確邸報仍通故城內幸俱安靜疑懼不生若地稍遠則言論詭雜傳聞失實民志不定宵小必從而生心當京城戒嚴時畿南一帶在在皆有土匪各屬下忙錢糧均遷延不肯卽納聞此時尙嚴催罔應若輩皆有業之民尙復藉端觀望若素不安分之徒且將造作謠言乘機煽惑河間土匪其已見者也然此猶密邇畿輔者耳至遠省則聞乘輿未回且謂都城危殆粵捻各匪益輕朝廷濟寧之圍幸卽解散儻再肆其鴟張安保河北之不騷動乎此皆臣之所謂可慮者也臣竊數史冊之紀巡幸者惟唐爲多然寇急則暫幸旁郡事定則卽還舊京故能人心繫屬轉危爲安誠以神京爲四方所歸極可暫離不可久曠也又金元兩朝皆興於朔漠及其得中國也俱入居於內地夫豈不樂舊都之安習而欲同車書一聲教非居中土不可元以開平府爲上都卽今熱河之地每年一幸夏往秋返蓋宅中圖大有國之常經也況見值多事之秋曠宮闕而弗居局偏陲而久憩雖萬幾無曠庶事咸理而使綱紀日漸廢弛人情各懷疑貳匪徒遂萌

北竄之謀四夷有輕中國之意甚非計也見今正屆嚴寒已奉諭旨暫緩回鑾臣何敢瀆請惟求皇上內定於中俟明歲春融卽啟蹕還京以慰羣臣之仰望以釋遠邇之危疑此事關繫大局安危其幾甚微而其理至顯全在宸衷獨斷弗爲衆論所遊移則臣民幸甚天下幸甚十二月調補戶部尙書十一年十月偕大學士賈楨周祖培尙書趙光奏政權請操之自上並皇太后召見臣工禮節及一切辦事章程疏載楨傳尋命在軍機大臣上行走先是甘肅番回之別種有撤回者在西寧府屬夾黃河而居性獷悍乾隆年間與土回辦教滋事幾危省城當時大兵討平邇年復因辦教與土回爭鬪擾及漢民焚掠西寧村落碾伯人恭之團練自衛遂與碾民爲讎提督成瑞率師往剿恇怯不前賊以愈肆總督樂斌於成瑞旣多迴護復輕信多慧力主撫議勒令民間撤團撤回益驕日出剽掠且與西寧辦事大臣多慧所陳善後事宜及保舉剿撫撤回人員復多有不實又信任成瑞及知府章柱文於公事亦多瞻徇爲言官所糾至是命兆霖前赴陝西查辦訊鞫屬實樂斌發往新疆效力成瑞多慧逮部治罪同治元年正月命署陝甘總督剿辦撤回二月京察屆期上以兆霖在軍機處行走實力助勦和衷共濟下部議敘三

月兆霖統領兵勇由碾伯進剿自四月至六月四路圍攻先後焚燬回莊二十餘處斃五千餘匪回勢窮蹙悔罪投誠兆霖察其情詞懇切委道員楊炳銜過山受降撤回五千餘人哀籲求撫並由番族百戶加具保結戎循一帶肅清事聞上嘉其辦理妥速並奏善後章程將西寧道府二缺變通調補獎懲辦理撤回各員並請將已革遊擊趙東鑑等陞擢遊擊閔相儒等革職都司陳華等議卹均如所請遂撤兵歸伍七月自碾伯縣起程行至平番縣屬之三道嶺溝地方猝遇雨雹山水漲發將兆霖行轎並關防及隨從兵役人等概行衝沒該處文武員弁先後馳救無及尋獲兆霖遺軀甘肅布政使恩麟以聞諭曰沈兆霖忠清亮直歷練老成由翰林洊陟清要疊掌文衡在上書房南書房行走蒙皇考文宗顯皇帝擢授正卿朕御極之初復授爲軍機大臣命往陝甘查辦事件旋命署理陝甘總督該署督受任以來卽帶兵出省實力辦理已有成效乃於途中猝遇山水漲發遽爾身殞悼惜殊深署陝甘總督軍機大臣戶部尙書沈兆霖著加恩晉贈太子太保銜照尙書例賜卹任內一切處分悉予開復應得卹典該衙門察例具奏並查照一品大員歿於王事例案聲明請旨其靈柩由甘肅起程時著沿途地方官妥爲照

料准其入城治喪伊子沈雲驥賞給舉人准其一體會試以示篤念忠蓋之至意又諭曰前因署陝甘總督沈兆霖途次出缺業經降旨從優給與卹典茲據甘肅布政使恩麟將該署督出缺詳細情形入奏並稱該署督故後闔省士民無不同聲痛哭且蕭條行李無異寒儒念其爲國宣勤歿於王事悼惜尤深沈兆霖著加恩入祀賢良祠以彰忠蓋尋賜卹如例予諡文忠光緒十五年正月慈禧端佑康頤昭豫莊誠皇太后歸政以兆霖前充軍機大臣夙夜在公襄成邦治命賜祭一壇子雲驥舉人一品廕生孫宗蕃順天北路廳同知

李棠階

李棠階河南河內人道光二年進士改翰林院庶吉士三年散館授編修五年充四川鄉試正考官提督雲南學政十一年充順天鄉試同考官十三年陞國子監司業十五年擢詹事府右春坊右中允尋丁父憂十九年補原官二十年五月遷翰林院侍講七月充山西鄉試正考官八月轉侍讀二十一年充署日講起居注官二十二年提督廣東學政二十三年授太常寺少卿仍留學政任會廣東巡撫黃恩彤以年老武生符成梅奏請賞給職銜上以其市恩邀譽嚴旨切責並將該



武生六十以後違例送考各學政交部嚴議棠階降三級調用旋以患病在籍調理咸豐初經侍郎曾國藩保奏召來京以病不赴三年金陵逆賊分股渡河圍攻懷慶各屬土匪響應河北大擾編修何桂珍尙書周祖培等先後奏請敕棠階籌辦河北團練得旨允行棠階力疾勸諭鄉團殲擒土匪解散脅從並督率民勇擊敗渡河賊匪於溫縣賊用是不能北竄巡撫英桂上其功賞給四品頂戴花翎同治元年復召來京棠階疏言用人行政先在治心治心之要先在克己請於師傅匡弼之餘豫杜左右近習之漸並於暇時講解御批通鑑輯覽及大學衍義各書以收物格意誠之效又言紀綱之飭在乎嚴明賞罰凡朝廷通諭各事宜務令督撫實力奉行不得虛應故事庶中外情志可通禍亂可弭上嘉納之擢大理寺卿是年六月陞禮部右侍郎七月授都察院左都御史八月兼署戶部尙書閏八月充軍機大臣棠階疏辭諭曰當此時事多艱李棠階受特達之知不次超擢自應竭盡愴忱以資倚畀其毋固辭尋賜紫禁城騎馬二年二月充順天鄉試覆試閱卷大臣授工部尙書兼署禮部尙書充實錄館總裁三月充會試正考官四月充覆試新貢士閱卷大臣旋疏陳人材保舉前候補道王檢心等以備任使詔如所

請七月充拔貢朝考閱卷大臣三年京察屆期得旨議敘四月充考試試差閱卷大臣會江寧省城克復賞加太子少保銜並其子洵舉人先是上御極之初命南書房上書房諸臣採擇前史事蹟纂輯成書進呈備覽賜名治平寶鑑至是命協辦大學士吏部尙書瑞常等每日輪流進講棠階與焉並諭曰進講之時務須剴切敷陳言必盡意毋得稍有避忌用副集思廣益至意八月充順天鄉試副考官四年卒諭曰禮部尙書李棠階植品端方持躬清正由道光年間翰林屢掌文衡歷陞卿寺朕御極以來復加簡任洵擢正卿令在軍機大臣上行走夙夜宣勞克盡厥職昨因微病賞假調理方冀速痊長資倚畀遽聞溘逝悼惜殊深著賞給陀羅經被派郡王銜貝勒載治帶領侍衛十員卽日前往奠醑賞銀二千兩治喪由廣儲司給發加恩晉贈太子太保照尙書例賜卹任內一切處分悉予開復應得卹典該衙門察例具奏伊子李洵著賞給郎中俟服闋後分部學習行走伊孫李續午著俟及歲時帶領引見其靈柩回籍時仍著沿途地方官妥爲照料用示朕篤念耆臣至意尋賜祭葬予諡文清五年文宗顯皇帝實錄聖訓告成上以棠階曾充總裁賜祭一壇光緒十五年正月慈禧端佑康頤昭豫莊誠皇太后歸政以

棠階前充軍機大臣夙夜在公襄成邳治命賜祭一壇

趙光

趙光雲南昆明人嘉慶二十五年進士改翰林院庶吉士道光二年散館授編修三年丁母憂六年丁父憂八年服闋十二年三月充會試同考官六月充陝西鄉試副考官十一月授江南道監察御史十三年正月抽查漕糧四月奏言本年東省漕糧到橋節次查出潮溼攙雜粟米一萬五千餘石此次爲數無多已覺辦理掣肘若南糧跟接轉運卽照例掣量尙且日不暇給再有潮溼攙雜殊屬滯礙難行查漕糧積弊不在沿牘而在外河糧剝乃致弊之源沿牘非作弊之所故外河查驗石壩抽查爲杜弊切要關鍵與其到橋探驗籌辦諸致稽延曷若在壩嚴查轉運自無蒙混應請旨飭下倉場侍郎嚴飭坐糧廳務於外河認真查驗其分駐石壩尤須逐細抽查遇有弊端立卽從重嚴懲庶足專責成而杜弊混又奏漕務積弊莫甚於南漕之折色北漕之剝船請嚴禁漕糧折色並安立剝船章程均如所請行九月轉掌廣西道監察御史十四年二月以通州沿河一帶有好商開設錢號豫備雜物攙和漕米並勾結船戶偷買偷賣囤積回漕等弊奏請嚴懲疏入

下所司議行三月遷戶科給事中四月稽察舊太倉六月充江南鄉試副考官八月提督河南學政十七年遷光祿寺少卿仍留學政任十八年七月陞大理寺少卿十二月陞光祿寺卿十九年三月稽察右翼覺羅學十月遷太常寺卿二十年三月充會試知貢舉累遷大理寺卿通政使司通政使六月充江西鄉試正考官二十一年充考試漢中書閱卷大臣二十二年八月擢都察院左副都御史十二月以接纂大清一統志全書告成下部議敘二十三年五月充考試差閱卷大臣九月充鄉試覆試閱卷大臣十二月陞內閣學士兼禮部侍郎銜稽察中書科事務二十四年四月歷充會試覆試閱卷大臣朝考閱卷大臣六月署兵部左侍郎九月充知武舉十二月充文淵閣直閣事二十五年以兵部堂官違例派署掌印未能查明更正光降三級留任尋授兵部右侍郎充朝考閱卷大臣二十六年二月署刑部左侍郎八月提督浙江學政二十七年轉左侍郎二十八年調戶部左侍郎兼管三庫事務均留學政任二十九年調兵部右侍郎三十年三月奏陳時務四條略言安民必先察吏州縣爲親民之官以天下之大分治於一千三百餘州縣秩分雖卑責任綦重近來積習相沿風氣日壞加以捐例屢開仕途益雜

罔識民事之艱難但較缺分之肥瘠幕友家丁招搖滋事書差胥吏又復從中舞弊聯絡把持賄囑情託無所不至委靡者怠玩因循不知振作貪酷者恣睢暴戾惟事誅求錢糧則任意侵虧詞訟則株連積壓及至衆怨沸騰輿情不洽上司或有風聞遇事參劾輒敢挾嫌抵制攻訐多端大吏慮其噬臍姑容不問不特各州縣毫無顧忌卽佐雜末吏亦且相率效尤應請旨飭令各直省督撫司道振作精神力除積習廉能者據實保舉惡劣者立即參黜勸懲一秉大公毋得瞻徇容隱庶僚屬各知儆畏官方肅而民氣和矣國家歲糜糧餉養育兵丁將以收實用也近日營伍廢弛將帥性耽安逸養尊處優備弁徒效趨承行私媚上以營卒爲廝役操演盡屬虛文以空名冒錢糧剋扣且以肥己兵驕將惰習氣已深加以軍裝器械敝壞不修火礮擡槍練習不熟陸路兵丁弓馬技藝尙有可觀沿海水師兵弁於海洋風色沙綫多不諳習出洋會哨奉行故事以致盜劫頻聞洋而不靖聞從前英人滋事水師不俟英船攏近輒先施放槍礮至英船漸近則槍礮熱炸火藥已罄遂至束手無策又聞兵心退縮往往未見賊蹤聞風解散因而兵器礮臺轉資賊用且軍行毫無紀律沿途恃衆需索擾害地方動輒鼓譟喧譁竟有本管

將官叩頭哀乞而後前行者軍令不振一至於此夫練兵必先練將邇來水陸將弁求其材藝出衆忠勇有餘緩急足恃如昔年之總督楊遇春已不可得卽如近年之提督尤渤竇振彪亦屬寥寥設有急需將帥之際何以收指臂之效然則肅軍政以勵士卒儲將才固今日之急務也應請飭令各直省將軍督撫提鎮整飭營務革除陋習秉公甄覈鼓勵人才務使有勇知方毋得因循疲玩庶武備修而可收實效矣詰奸除暴以安良善弭盜之方莫如保甲近來盜風愈熾直隸山東陸路行旅往來多被搶劫兩湖三江連年水災盜賊日衆至如河南之捻匪四川之囑匪廣東之土匪貴州之苗匪雲南之回匪又皆肆意橫行目無法紀且到處均有邪教會匪各立名目煽誘鄉愚脅從既衆蹂躪尤多地方文武恐滋事端苟且因循惟務姑息書差既象賊縱容兵弁復得規徇隱州縣之勤幹者有時查訪嚴拏則差役通風武弁解體奪犯戕官往往釀成巨案其愚懦者平時既不以緝捕爲務至報劫頻聞恐干嚴議輒復諱盜爲竊避重就輕以至匪徒益無忌憚若不急爲整頓則盜賊肆行奸匪交接其禍害有不可勝言者應請敕令各直省督撫嚴飭地方文武各官認真緝捕奉行保甲著有成效者據實獎勵疲玩廢弛不

知振作者撤參重處毋許稍爲迴護庶捕務勤而盜賊斂迹矣直省倉庫錢糧各有定額州縣官如果儘數徵解前後交代清楚何至虧空盈千累萬之多其所以致虧空之由厥有數端或紈袴初登仕版習尙奢華或庸愚委任親隨開銷浮濫或負累已深以官項償其私債或交遊太廣以正款供其應酬及至寅支卯糧東挪西掩有漕者藉口於幫丁之需索解庫者歸咎於糧價之增昂夫州縣之賠累原屬有因然使平素果能潔己奉公量入爲出卽受累亦不致過多乃不善於經理以致剗肉補瘡焦頭爛額道府卽或查知往往礙於情面轉爲曲意彌縫後任慮招衆怨而不敢發上司恐興大獄而不敢參卽使查鈔終歸無著是以州縣交代有歷數任而未算結者有合數十州縣而未盤查者前者欽差大臣會同各督撫清查整理嚴定章程虧短各案業已分別攤賠第恐舊虧未完新虧已續若不實力整頓其弊伊於胡底至杜虧空之法惟以清理交代爲要應請敕令各直省督撫督同司道各官於所屬新舊交代之際詳細查明交代未清者不得委署陞補實有虧挪者卽行從嚴參辦庶州縣慎重錢糧款項不致虛懸而徵解皆歸實用矣疏入上優詔嘉納焉四月充會試覆試閱卷大臣咸豐元年正月偕署正藍

旗蒙古都統明訓承修福陵工程時盛京有盜伐山陵樹株之事命光與明訓就近提訊尋將知情故縱之總管全喜等鞫實治如律八月轉左侍郎二年二月充各省鄉試補行覆試閱卷大臣六月署吏部右侍郎八月署戶部右侍郎兼管錢法堂事務九月歷充順天鄉試覆試閱卷大臣知武舉三年正月以訊明私確一案奏請將吉林佐領依錄等分別治罪先是吉林堂主事喜林達爲其子德敏夤緣倖進將軍固慶放缺不公挑甲不遵定制復於依錄查拏私確明知受賄仍派會審副都統琦忠隨同標畫事隔數月始行附參上命光偕署吉林將軍宗室恩華前往查辦至是均鞫實褫職發遣有差三月充會試知貢舉四月命赴順天府各屬查勘礦山旋擬定開採章程奏聞下所司議行十一月充實錄館副總裁十二月擢工部尙書以捐備軍餉下部議敘四年正月充經筵講官二月充實錄館總裁尋管理戶部三庫事務五月調刑部尙書十月賜紫禁城騎馬六年二月充各省鄉試補行覆試閱卷大臣九月充武會試正考官十月以宣宗成皇帝實錄聖訓告成加三級八年四月命偕吏部尙書周祖培等辦理五城團防事宜九月署工部尙書九年三月充會試副考官五月充教習庶吉士九月充大考翰詹閱



卷大臣十一月以刑部司員辦案草率未能查出罰俸二年十年正月以辦理秋審情實錯誤及京察大典薦舉不實先後鐫級留任三月署兵部尚書閏三月歷充會試覆試閱卷大臣各省鄉試補行覆試閱卷大臣十一年九月偕大學士賈楨周祖培戶部尚書沈兆霖奏政權請操之自上並皇太后召見臣工禮節及一切辦事章程疏載楨傳十月充武會試正考官署戶部尚書同治二年以雲南回匪滋擾奏請將昆明等處殉難紳民旌卹允之二年署吏部尚書四年卒諡曰刑部尚書趙光持躬恪慎歷練老成由翰林洊陟正卿歷事四朝疊司文柄擢任刑部尚書十有餘年勤勞懋著倚畀方殷昨因病乞假當經賞假調理遽聞溘逝悼惜殊深趙光著照尚書例賜卹派郡王銜貝勒溥莊帶領侍衛十員卽日前往奠醊任內一切處分悉予開復應得卹典該衙門察例具奏尋賜祭葬予諡文恪

許乃普

許乃普浙江錢塘人嘉慶十九年由拔貢生朝考以七品小京官用分刑部二十一年丁父憂二十四年服闋二十五年正月充軍機章京五月以一甲二名進士授翰林院編修道光二年充河南鄉試副考官三年二月命在南書房行走三月

充會試同考官尋因仁宗睿皇帝實錄聖訓告成遇缺陞用四年大考二等記名  
遇缺題奏並賜文綺旋擢詹事府司經局洗馬五年六月充湖北鄉試正考官旋  
提督貴州學政十一月陞翰林院侍講仍留學政任七年偕雲貴總督阮元等奏  
請添設郎岱廳學酌定文武學額及貢廩增額缺下部議行八年任滿回京命仍  
在南書房行走九年轉侍讀時上以南書房事簡人多命乃普暫同庫衛門十一  
年充山東鄉試正考官十二年七月仍命在南書房行走八月充順天鄉試同考  
官九月以京察一等覆帶引見記名以道府用十三年大考二等陞侍講學士旋  
提督江西學政十六年遷詹事府少詹事仍留學政任十七年任滿回京命仍在  
南書房行走旋陞詹事十八年二月擢內閣學士兼禮部侍郎銜四月署兵部右  
侍郎五月授刑部右侍郎命毋庸入直南書房十九年正月署經筵講官三月調  
吏部左侍郎並署戶部右侍郎兼管錢法堂事務時輔國公景綸等刑偪孫三供  
認放火一案經刑部訊明平反有旨將原審司員交吏兵二部嚴議七月上以乃  
普等巧爲開脫所議未協降四級留任二十年正月充經筵講官三月兼署戶部  
左侍郎十一月調戶部左侍郎兼管三庫事務二十一年閏三月陞兵部尙書九

月以失察輿夫在武場滋事降一級留任十一月賜紫禁城騎馬二十二年偕兵部尙書裕誠等會議裁撤伊犁鎮總兵缺移置天津並酌裁官弁兵丁從之先是戶部銀庫查有虧短情弊歷任管庫查庫王大臣均議褫職乃普蒙恩改爲革職留任其虧短銀兩仍令罰賠二十三年閏七月以完繳罰賠銀兩開復革職留任處分八月充順天鄉試副考官二十四年三月兼署工部尙書八月命覆覈朝審偕大學士穆彰阿等奏稱刑部擬以緩絞之閻四一犯黑夜行兇手刃三命檢查城坊初供並無誤傷字樣應請改入情實從之二十五年正月充經筵直講三月充會試副考官五月因派候補主事署理掌印並失察司員索詐吸煙書吏降五級調用尋又以失察刑部書吏積壓文書罰俸一年十二月補太常寺少卿二十七年擢光祿寺卿二十九年浙江大水捐銀備賑下部優敘三十年三月命仍在南書房行走文宗顯皇帝御極詔求直言乃普條陳五事一方今先務莫急於正君心培聖德伏惟列祖列宗聖訓心法治法先後同符顧列朝各自爲書卷帙宏富一時不易檢尋請敕下館臣合列朝聖訓依類分門排日進呈如當今之文治武功河防漕運鹽政錢法海防邊防等均應奉典謨訓誥爲宗主而後辨羣言之

是非察人心之邪正審事幾之利弊定刑賞之權衡紛至沓來不淆定鑑如宋臣蘇軾所慮求治太急聽言太廣臣知其必無此弊矣一伏讀恩詔各直省保舉孝廉方正誠盛典也顧地方官非仕優而學者斷不暇留意人才其耳目不能不寄之儒學自教官開捐納之途末學小生比比而是此輩品學既不能自信安能以品學衡人應請敕下各直省學政將增附捐納之教官嚴加考覈或會同撫臣扁試非文理較優卽令開缺候補儒學得人則所舉庶幾可恃其有曾任京外官引退家居果能敦睦宗族約束子弟身先齊民首完國課遇有地方義舉不吝解推鄉評具在尤不難綜覈而知應請一體敦遣來京引見恭候欽定庶不虛此盛典一刑部有所謂服制案者罪人致死胞伯叔及胞兄之案夾籤聲明並非有心干犯卽得援照入冊倖逃顯戮其初由地方有司溺於救生不救死之說並以地方出有逆倫重案爲諱於是巧爲開脫豫爲彌縫避重就輕相沿成習而期親尊長之沈寃覆盆莫昭於世道人心關係甚鉅應請敕下刑部應如何斟酌理無枉無縱俾倫常不斁而刑罰以清悉心定議恭候御裁一各省偶有不靖綠營弁兵往往臨陣畏蕙轉恃鄉勇爲捍禦此皆不嫻火器之故也若於平時講求擡礮擡

槍及鳥槍長技訓練有素施放有準則膽氣自壯綠營何嘗非勁旅哉前時瀕海將弁往往不能燃礮礮位每爲敵人所奪嗣經定有水師營弁引見時先令演礮之議近來頗能嫻習其武職到京似可於兵部驗看時兼看火槍俾該武弁等知火器不嫻與騎射無準同罰自當加意練習於平時矣道光二十年前諭近山濱海地方必應存留鳥槍守禦者報明地方官於槍械上鑿刻姓名編號立册存案見在如甘肅之野番四川之猺夷湖南貴州之紅苗與居民偏近處所應由地方官示知民人遵照聖諭存留鳥槍庶可守望相助有備無患一乾隆四十年敕撰醫宗金鑑一書康濟民生海內言醫學者奉爲圭臬見在內外大小臣工通知醫學者未必竟無其人應請敕下內外大臣就所知者隨時保奏其外省城市山澤有知醫者由地方官勸諭來京仿宋時太平惠民和劑局於京師設立醫學凡各旗民人等准令就診或授以兼太醫院銜或酌予以登進之階於仁壽斯民之意未必無補得旨下所司議奏其服制案罪名復申諭各直省督撫及刑部務得實情以昭平允七月命恭送宣宗成皇帝梓宮咸豐二年五月授內閣學士兼禮部侍郎銜七月充山東鄉試正考官十月署工部右侍郎兼管錢法堂事務旋疏陳

軍營奏報類多欺飾略曰自廣西軍興以來不曰賊勢窮蹙卽曰指日蕩平乃賊匪自永安而桂林而長沙而岳州今歲竄入漢陽窺伺武昌至陣亡兵丁練勇每次奏報均無確數顯爲冒銷糧餉地步應請設立行營御史數員分駐進兵及防堵處所遇有功罪不允賞罰不明及以少報多以敗爲勝者准其由驛單銜馳奏疏入得旨令各路統兵大臣及各督撫力除積習認真稽察其朦混掩飾者據實嚴參十二月授兵部右侍郎三年正月戶部舉辦在京商賈捐輸乃普奏言欲令商賈輸將必先令富紳倡率蓋富民與富紳同荷帡幪而富紳之受恩尤重其應捐輸一也商賈志在謀利尙且誼切同仇富紳職在奉公更宜情殷敵愾其應捐輸二也商賈之子弟或僅世其產業富紳之子弟莫不志在顯榮其應捐輸三也且滿漢富紳昭昭在人耳目皇上召見廷臣時一問可知不似商賈散處閭閻必待地方官展轉查報旣恐上下其手亦且緩不濟急見今在京王公大臣及文武各員雖經捐輸在案但其中久著富名廣有田園產業者尙不乏人若僅照常捐輸而商賈細民以銖積寸累之資令其傾囊助餉不生怨讟已屬難能尙望其輸將踴躍乎應請旨飭下部臣先議富紳捐輸其有子弟家丁開設典當銀號與各

行鋪及廣置市房出租者無論在京在外皆令據實陳明捐輸助餉爲商賈之倡從之尋因安徽軍務緊要奏言自九江府城失守皖省待援方急且陸路逆匪距宿松甚近急宜防勦所有調往河南之黑龍江官兵素稱勁旅於陸路尤屬相宜儻俟行抵河南信陽一帶再令折赴安徽不特道途迂遠時日遷延卽沿路供支亦多冗費見在黑龍江二起官兵甫過都門其餘八起尙未抵京應請飭令由山東江南驛路徑赴安徽較爲直捷遠可資江省之接近可固廬州之圍二月從上耕耨田加一級三月兼署刑部右侍郎旋實授五月因要犯劉秋貴死於獄中承審司員未能審出實情乃普坐失察降一級留任旋擢工部尙書復調刑部尙書疏陳時務略曰逆匪攻陷州縣輒開獄縱囚充牌刀手應請將距賊較近之各府州縣監犯除情罪輕者毋庸議外其強搶重案及火器殺人在獄緩決者不必聽候部覆准其就地卽行正法如由刑部查覈行文不特時日有稽且該處距賊遠近亦難懸揣應由該督撫隨時隨地酌量緩急檄各屬妥速辦理一面正法一面具奏斷不可徇於流俗陰功之說暫延一重囚之命致荼毒千百人之身家亦豫除逆黨之一策也向來河工失事均令在事人員分別攤賠原以國家經費有常

此等失事人員漫不經心虛糜帑項若僅照例斥革不足動其傲畏之心轉得遂其侵漁之計嗣後奉命防剿之統兵大臣及督撫司道如果屢獲勝仗收復城池或防剿嚴密賊匪不能入境准令開銷經費其防剿疏懈致賊竄擾者照例治罪仍請解部監追分成著賠以前廣西湖南湖北及九江安慶金陵揚州等處失事各員除已殉難者毋庸議外其餘皆有防剿之責或遷延貽誤或遇賊卽逃皆屬糜帑殃民罪無可逭卽應援照河工舊章將用過防剿經費責令分別罰賠至如何分成勒限完繳之處請敕部覈議恭候聖裁得旨下部議奏八月疏言籌剿江南賊船惟廣東之快蟹船最爲便捷請敕廣東督撫酌調水師官兵派委鎮將大員管帶快蟹船駛入長江助剿又奏逆匪擾及豫省防剿緊要情形又奏參山西巡撫哈芬不能防賊並奏保工部郎中馮志沂頭等侍衛趙延煇赴幫辦軍務勝保軍營差委允之先是國子監司業崇福奏請將咸豐四年山西全省錢糧豫先借徵經軍機大臣等會議推廣將陝西四川兩省錢糧一律借徵乃普偕侍郎何彤雲奏言各省情形不一應由各該督撫體察情形除山西被賊各州縣毋庸借徵外其地瘠民貧之陝西延安榆林綏德興安四川之寧遠亦請概不借徵至畸



零小戶數畝或數十畝僅資餬口仍令照常完納庶不至重困民力又奏言時值嚴寒兵丁尤當撫恤聞通永鎮步兵四百名去賊最近而大半尙衣單夾兼以行營地方食物本貴無錢者往往攫取以致市販裹足兵丁轉不免飢寒應如何撫恤之處請敕帶兵大員酌量辦理時江寧踞賊分股北竄由山東高唐至直隸獨流鎮官軍攻剿兩月未克乃普奏言獨流街市形如摺扇北爲扇軸南爲扇面其東西則扇之兩旁也東西面均有高隄難以得手北面地勢甚狹亦難用兵須從南面進攻且獨流地勢甚高街中有樓登樓眺望我軍動息賊皆知之似須乘夜進兵攻其不備十二月奏言江南糜餉老師皆由琦善等意見不和舒興阿自陝赴皖行走遲延需索地方若與江忠源會剿不獨難以和衷且恐因之掣肘又奏餉需艱難軍務一日不葺卽經費一日不敷惟在糧臺各員力求覈實尤在帶兵大帥剋日奏功是月充實錄館總裁四年正月充經筵講官二月刑部主事王式言承審命案聽受請託失入絞罪上命裕誠等會審乃普以式言係門生奏請迴避上不許復有旨諭刑部將實情審出寬其失察之罪若故意開脫必當加等治罪嗣經裕誠等審出式言家人受賄確供上責乃普迴護門生處處爲開脫地步

命降補內閣學士毋庸在南書房行走四月授禮部右侍郎尋轉左侍郎六月命  
偕吏部尚書柏葭謹勘昌陵工程九月調戶部右侍郎兼管錢法堂事務十月調  
吏部左侍郎旋擢都察院左都御史五年稽察戶部三庫六年三月充會試副考  
官十一月陞工部尚書七年命恭送孝靜康慈皇后神牌還位八年四月命偕吏  
部尚書周祖培等辦理五城團防五月以浙江軍務緊急奏請飭前任兵部侍郎  
曾國藩由楚赴浙與周天受等圍剿八月恭送玉冊玉寶赴盛京下部議敘旋命  
偕刑部尚書趙光等勘估萬年吉地十二月奏言擒匪疊次北擾由河南之歸德  
陳州竄至杞縣遂陷周家口旋擾山東曹單一帶宜令大員統帶重兵屯於皖豫  
交界地方障河南以安東直兼衛京師又奏河南南汝光一帶與皖楚毗連擒匪  
粵匪常存窺伺邱聯恩見駐光州所帶兵勇爲數無多應請添派精兵歸其管帶  
以張犄角之勢又保奏遊擊滕家勝聯絡鄉團聲勢極壯可備干城之選九年五  
月調吏部尚書八月命覆覈朝審十年正月充經筵講官二月上以三旬慶辰加  
恩在廷耆臣賞乃普太子太保銜旋奏參辦理安徽軍務左副都御史張芾藉口  
防堵從未進剿致賊疊陷徽寧所屬各縣徑撲杭州請明正張芾之罪並將周天

受不能扼截援應之罪查明是否張芾調度無方一併嚴議四月以前任工部堂官時失察司員收受商人錢文下部議處六月因浙江軍務危急偕都察院左都御史沈兆霖等奏保在籍紳士前任漕運總督邵燦前任左副都御史王履謙等辦理浙江團練又奏保杭州駐防協領傑純文舉人成勝堪勝帶練防剿詔如所請尋因濫保前任寶源局監督瑞琇京察一等降二級留任九月因病陳請開缺允之乃普自道光二年至咸豐九年充殿試讀卷官三次武殿試讀卷官一次新貢士朝考閱卷大臣五次並歷充鄉試覆試會試覆試宗室鄉試會試考試漢教習庶吉士散館考試試差大考翰詹考試學正學錄閱卷大臣同治五年卒諡曰前任吏部尚書許乃普學問優長供職恪慎嘉慶年間由一甲二名進士授職編修道光初年入直南書房洊擢正卿屢司文柄咸豐年間賞加太子太保銜嗣因老病開缺調理方冀頤養安和遐齡克享茲聞溘逝悼惜殊深許乃普著加恩照尚書例賜卹任內一切處分悉予開復應得卹典該衙門察例具奏以示篤念耆臣至意尋賜祭葬予諡文恪子彭壽內閣學士兼禮部侍郎銜鈐身福建按察使孫之俊恩賞舉人

曹毓瑛

曹毓瑛江蘇江陰人道光十八年由拔貢生朝考二等以七品小京官用分兵部二十三年中式舉人二十六年充軍機章京咸豐二年二月丁父憂七月丁母憂五年六月服闋仍充軍機章京十一月陞主事七年陞員外郎九年陞郎中尋記名以御史用十年二月擢鴻臚寺少卿時粵匪竄擾江南蘇州常州相繼陷五月毓瑛奏請急攻蘇常分兵迅剿以牽賊勢而保大局略言拯溺救焚其事宜急而不宜緩擣虛批亢其事宜合而不宜分臣前讀都興阿之奏擬自英山由豫繞赴徐宿以達江北而曾國藩通籌方略擬分三路進剿俟八月大舉竊謂都興阿由豫以抵江北程途紆遠非兩月不能到浙江自蕭翰慶陣亡江長貴由平望退守銳氣盡銷以屢潰之兵而禦剽悍之賊待至八月松太各屬嘉湖杭州諸郡勢將瓦解蔓延愈廣規復愈難爲今之計都興阿宜帶兵自英霍取道臨鳳以抵江北不過旬日可至卽由通泰過江直抵江陰進攻常州無錫爲一路而以周沐潤所募沙勇副之鎮江見有兵萬餘巴棟阿馮子材向奎進規丹陽爲一路薛煥在上海捐資添募勇丁萬人由嘉定太倉崑山進攻蘇州爲一路而以張玉良出嘉興

平望之師副之曾國藩率楚兵由寧國取道廣德進攻嘉湖爲一路以策應諸軍而令米興朝攻宜興溧陽周天受攻高淳東壩曾秉忠督長龍船入太湖以副之攻賊所必救據賊所必爭東南大局尙可有爲然後俟曾國藩所募之勇到齊分路進剿庶於事有濟而江浙不至受困矣十一年十月命在軍機大臣上學習行走十二月陞順天府府丞同治元年正月京察屆期下部議敘尋陞大理寺少卿二月兼署宗人府府丞八月陞大理寺卿十月命在軍機大臣上行走二年正月陞工部左侍郎二月調兵部右侍郎十月賜紫禁城騎馬三年正月京察屆期復下部議敘六月江寧克復賞頭品頂戴並賞戴花翎是月署吏部右侍郎八月署兵部尙書四年二月遷都察院左都御史十一月擢兵部尙書五年卒諡曰兵部尙書曹毓瑛居心誠懇立品端方道光年間由部曹充軍機章京咸豐十年陞鴻臚寺少卿朕御極後復加簡任令其在軍機大臣上行走洊擢正卿數載以來矢勤矢慎克稱厥職昨因微疾賞假調理方冀速痊長資倚畀遽聞溘逝悼惜殊深業經賞給陀羅經被著派惠郡王奕詳帶領侍衛十員前往奠醴賞銀二千兩治喪並加恩晉贈太子少保銜照尙書例賜卹任內一切處分悉予開復應得卹典

該衙門察例具奏伊子曹鐘彝著賞給員外郎俟服闋後分部學習鈞彝著賞給舉人服闋後准其一體會試錦彝鈺彝著俟及歲時由部帶領引見其靈柩回籍著沿途地方官妥爲照料用示篤念盡臣至意尋賜祭葬予諡恭愨光緒十五年正月慈禧端佑康頤昭豫莊誠皇太后歸政以毓瑛前充軍機大臣夙夜在公襄成郵治命賜祭一壇

譚廷襄

譚廷襄浙江山陰人道光十三年進士改翰林院庶吉士十五年散館以主事用分刑部二十三年補官二十四年二月陞員外郎五月陞郎中二十六年記名以繁缺知府用二十七年二月授直隸永平府知府十月調補保定府知府二十九年署通永道旋實授三十年調補清河道咸豐二年以幫辦海運出力並捐備軍餉下部優敘三年正月署直隸按察使十二月陞兩淮鹽運使四年正月直隸總督桂良奏留籌辦巡防事宜三月擢山東按察使仍留直隸辦理海運六月授順天府府尹十月稽察左翼覺羅學五年二月命赴天津驗收海運米石五月擢刑部左侍郎仍兼署順天府府尹九月充武鄉試監臨並較射官六年正月復偕倉

場侍郎阿彥達赴津驗收米石六月倡捐海運餘米下部議敘尋以驗收海運完竣賞戴花翎八月授陝西巡撫十二月署直隸總督七年正月湖北襄樊匪徒竄擾毘連陝境廷襄檄派將弁會同湖北官兵疊破賊壘進攻竹山縣克之是時各省採買米石運交京倉廷襄奏稱陝西至京運道難通且產稻無多見擬籌銀解京由部酌買允之旋赴直隸總督任五月奏言東明縣城被水衝塌見擬籌款堵禦並撫恤居民如所請行又以直隸鹽梟充斥奏請從嚴懲辦得旨嗣後商巡緝匪准其攜帶鳥槍如遇大夥梟販拒捕格殺弗論至地方官查拏梟販遇匪徒數十人以上橫行搶劫卽照拏辦土匪之例審明後卽行正法六月永定河水漫溢廷襄奏將防護不力各員懲處並自請議處八年三月實授直隸總督時天津海口有外國兵船駛入廷襄遵旨赴天津偕倉場侍郎崇綸密陳海口情形疏言俄與英法美各國情形雖殊其心則同一叵測見時俄人意極迫切自當因勢利導剴切曉諭以冀漸次馴伏諸國嗣諭廷襄與崇綸一同接見各使復奏言臣廷襄抵大沽駐紮有俄人通事投遞公文臣等接見該俄使普提雅廷詞色頗屬恭順惟求將分界通商二事代爲奏辦臣等查分界一事上年業已奉旨准將從前未

曾分界之烏特河一處會同覆勘其餘以興安嶺爲界山南爲中國山陰爲俄國自有一定疆土會勘自可分曉該使又稱黑龍江左界有滿洲人生聚意欲移於江右所費約銀十萬兩該國情願助給臣等以大皇帝撫馭中外普天之下莫非王土旗人生聚之所豈能給費遷移此等不情之請不敢具奏該使亦卽語塞又通商一節該使總以別國通商口岸須准一體通商臣等告以伊國通商見有三江口岸如欲仰乞恩施量爲加增須俟奏明請旨尋又偕崇綸等接見美使奏稱臣等到口以禮接待當諭以大皇帝以爾在粵不肯幫助英法深爲嘉許今與英法同至究因何故據云廣東之事與伊無干伊與俄國擬向說合故來請見又云伊曾有國書於咸豐六年在浙閩呈進代奏不料原封拆動後仍復交還懇請再爲代奏當卽捧書送閱並稱必求大皇帝璽書賜覆方見兩國和好臣等答以國書與公文不同未便冒昧接收應俟請旨遵辦等語至英法兩國應俟俄美兩國評理後方可接見尋奏言連日體察其情不一英法悖理俄美輸情而其欲鑿所求則彼此並無二致臣等明知一經交仗海運立時梗阻津郡騷然種種可慮惟事勢所迫此等無禮之人斷不能空言馴伏聽我指揮若不據實直陳則獲咎滋



大伏乞皇上就臣等前奏各款俯加採擇先將俄使量予恩施疏入上命奕山於黑龍江會同俄國公使秉公勘辦分界事宜仍諭廷襄將俄使所請五口通商酌量允許並准美使於五口外閩粵附近處所添二小口廷襄疏言臣等接到寄諭卽照覆俄使彼乃復舉已駁舊說欲以黑龍江烏蘇里河綏芬河爲界不肯以興安嶺爲界反覆無常情殊可惡嗣據美使復來接見臣等將所請各款已與剴切分割語尙近理其通商口岸一節臣等尙未肯遽允增添賠補一條請以將來稅課扣抵臣等極言駁斥旋因英船闖入內河轟傷兵勇礮臺被占廷襄自請治罪上以其調度無方命褫職留任拔去花翎四月奏稱英船退回三岔河待撫並探聞英船內暗帶潮勇且有步隊近日又有續到船隻臣等派員告以欽派大學士桂良等日內卽可到津飭令等候又附片密陳天津郡城無一日之水無隔宿之糧城外塵肆毗連河路錯雜戰守兩難不得已仍行議撫但使津郡能羈縻一日則京師可籌備一日伏願皇上密飭僧格林沁嚴防陸路北竄並令各旗整飭勁旅以備非常臣與津存亡自誓已久非敢以言撫爲退縮求生地步奏入諭曰汝節制全省豈止守一郡耶若如是自誓實爲有負委任如大局何尋奏言臣蒙訓

詞嚴切何敢以一死塞責致誤大局惟恐外兵一經登岸立即不可收拾隨卽遣員與之理說先以不准登岸入城相約又恐其以購買什物爲由誘惑愚民因令團總張錦文等設一公局經理其事凡洋船日用准爲代買不准與民間交接所可慮者津郡向多匪藪一與廣勇潮勇聯合爲患匪細臣令團總等加意整飭且各門各路皆有兵勇分管地段聯絡守禦五月奏言遵旨嚴密布置防其北竄並急籌攻戰以衛地方嗣因海口礮臺失守爲欽差大臣僧格林沁所劾上責其怵怯無能命革職來京聽候查辦尋遣戍軍臺九年九月釋回賞五品頂戴赴直隸大順廣一帶幫辦團練事宜尋以捐輸銀兩加四品頂戴十月賞三品頂戴署陝西巡撫十年三月奏請出糶各屬常平倉穀以濟軍餉先是御史李培祐奏參前任陝西巡撫曾望顏任性妄爲聲名狼籍等款上命廷襄查辦至是覆奏望顏舉劾屬員粗率錯謬又令伊子干預公事請下部嚴議六月命督辦陝西團練尋奏西安漢中延榆綏各鎮向歸陝甘總督統轄惟總督在甘肅距各鎮甚遠有鞭長莫及之勢可否准令巡撫統率以便整飭營伍奏入諭令俟陝甘總督樂斌到陝妥爲商酌八月廷襄遵旨密查天主教疏言天主教流入中國有年愚民被惑入

教者所在多有惟見在洋務未定若令到處窮搜轉滋疑惑惟有密飭地方官於稽察保甲時留心訪察如有習天主教之人另冊密記以便隨後設法開導或冀漸啟愚蒙上躔之又奏籌濟餉需請酌照京局章程勸捐以佐經費下部議行時外人撫局未定中外臣工有建言請西巡者諭令廷襄偕樂斌會議疏陳三便二難議旋寢十二月偕樂斌奏請將陝西綠營兵額裁馬改步如所議行十一年正月賞二品頂戴補授山東巡撫時曹州土匪勾結東昌匪黨滋事四月帶兵馳赴荏平督剿東昌臨清賊股連戰勝之五月克東昌府河西賊巢六月克張秋鎮八月復濮州適擒匪搶渡運河偪省城廷襄督營總烏爾貢扎布率隊繞出賊前迎剿大破之賊東竄省城解嚴九月命督辦山東團練請於山湖兩路扼要嚴防以禦外侮上可其奏十一月御史曹登庸劾廷襄濫保屬員上命曾格林沁查奏以委用非人下部議降三級留任是時山東州縣積年虧空至七十一萬有奇廷襄請飭查清理得旨允行同治元年三月匪首馬傳山竄踞南泉民圍飭遊擊范正坦等擊破之六月以山東軍務稍定奏請舉行壬戌恩科並補行辛酉正科鄉試詔如所請七月兼署河東河道總督八月以兗州各屬被賊濟寧各屬被旱被水

請將新舊錢糧分別酌緩允之二年截剿河西竄匪生擒戕官要犯張全堂及匪首楊蓬山等悉寘之法三年七月授刑部右侍郎十一月來京四年三月充會試副考官六月署管理戶部三庫事務十一月命在總理各國事務衙門行走調補工部右侍郎兼管錢法堂事務五年三月遷戶部左侍郎兼管三庫事務九月湖北巡撫曾國荃奏參總督官文貪婪欺罔各款命偕刑部尙書綿森前往查辦十月賜紫禁城騎馬十二月命撤官文任以廷襄署理湖廣總督六年正月偕綿森查明官文原參各款覆奏請下部嚴議從之五月御史佛爾國春奏參曾國荃動用竹木稅銀修理衙署廷襄等遵旨查奏並無其事尋佛爾國春又奏廷襄所奏湖北省督撫司道動用竹木稅銀餽送各員業已著賠等語惟咨部清單未經分晰請旨飭查以杜朦蔽上命廷襄等明白回奏尋偕綿森覆奏畧言湖北省三次失陷以來辦公草創不循例案如酬應等類居然動用官款今因濫支竹木商捐而責令分賠加以處分亦足以示警矣若因而罪及所受之人甚至路遠給資親喪受賻一概令罷吏議似非王道本乎人情之義且此案咎在濫支之人不在收受之人今既將官文等議處著賠所有收受各員應請仍照原案概免置議疏入

允之八月署吏部右侍郎十一月陞都察院左都御史十二月擢刑部尙書七年三月兼署吏部尙書閏四月充朝考閱卷大臣八月兼署都察院左都御史九月充武殿試讀卷官八年三月復兼都察院左都御史九年四月因病請假旋卒諭曰刑部尙書譚廷襄持躬端謹練達老成由翰林院庶吉士改授部曹歷任監司疊膺疆寄旋以侍郎洊擢尙書並令在總理各國事務衙門行走敷歷中外宣力有年均能恪盡厥職昨因患病賞假方冀調理就痊長資倚畀遽聞溘逝悼惜殊深著加恩追贈太子少保銜賞給陀羅經被派貝勒奕劻帶領侍衛十員卽日前往奠醮照尙書例賜卹任內一切處分悉予開復應得卹典該衙門察例具奏伊子戶部候補主事譚寶琛著俟服闋後以本部員外郎補用譚寶璿著賞給舉人俟服闋後准其一體會試其靈柩回籍時著沿途地方官妥爲照料用示篤念耆臣至意尋賜祭葬予諡端恪子寶琛戶部郎中寶瑛兵部郎中寶琬二品廕生刑部主事寶璿恩賞舉人內閣中書

羅惇衍

羅惇衍廣東順德人道光十五年進士改翰林院庶吉士十六年散館授編修十

七年提督四川學政尋召對上以惇衍年少恐於事務未能周悉命仍留京供職二十年五月充四川鄉試副考官十二月充文淵閣校理二十三年三月大考一等陞翰林院侍講六月充日講起居注官閏七月充山東鄉試正考官十一月轉侍讀二十四年擢侍講學士二十五年三月充會試同考官五月遷通政使司副使九月陞太僕寺卿二十六年提督安徽學政二十九年六月以衙署被水冊籍散失自請議處上加恩寬免九月遷通政使司通政使三十年三月陳端本善俗疏略言古帝王立綱陳紀根源祇在一心檢攝此心莫先於居敬窮理居敬窮理莫先於勤省察勤省察莫先於觀覽載籍聖祖仁皇帝御纂性理精義一書其總論爲學之方立志之要由存養省察致知力行以及人倫性命皆有程途可按階級可循至於論君道用人田賦學校禮樂兵政等類尤足以端主極而肅官方惟在皇上萬幾之餘講習討論身體力行之耳世宗憲皇帝硃批諭旨所載臣工奏摺凡二百二十三人皆恭錄批簽使其知所陳之得失明見萬里自古所無皇上於揆幾之暇並將此書日閱一二事凡督撫所奏有能深謀遠慮措置得宜者固蒙褒答若不實不盡及飾詐懷私者亦一一爲之指示周詳庶大吏皆知所警戒

他若御纂資政要覽庭訓格言諸書皆本心法治法而一以貫之伏願皇上本法祖之意以修己推而知人安民皆得其道天下有不蕩平正直者哉又請諭令部院大臣各舉所知以備京卿及講讀之任無論京外及家居之員皆得臚列其平日實行登諸薦牘又請敕直省督撫提鎮學政皆得犯顏直諫指陳天下利病無所忌諱卽藩臬中有能披瀝肝膽暢所欲言者亦許自行密封令督撫代爲呈遞疏入上嘉其愛君之誠並飭諭中外大臣實力奉行咸豐元年奏請崇儉禁奢略言嘉慶以前物力豐阜人知侈靡爲無益故好尙正而異物不能遷今則汰侈是從遇有婚嫁喪葬等事動輒費千餘金或數百金無者多方稱貸以取辦問其度日之費往往朝不謀夕豈不昏愚可憫又京外各官尋常宴會動至一席費五六金外官款宴上司竟有一日而費百金者此類靡耗不一而足三十年中日甚一日乃至婢妾幼穉亦復被華采而飾珠玉豈惟暴殄尤屬僭踰又其甚者患婚嫁之費而至於溺女不舉是不慈也因窀穸之費而至停棺不葬是不孝也不慈不孝豈非人心風俗之大害乎查道光八年曾照會典刊刻簡明規條有司未能奉行故凡典禮之切於日用倫常者皆無率循不越應請飭下禮部就會典通禮二

書撮其簡約常行者以爲條教之式俾海內臣庶皆可家喻戶曉必期革奢而返儉是誠今日救時之急務也從之五月充福建鄉試正考官二年三月充會試知貢舉八月署吏部右侍郎十一月日食惇衍以順治元年至乾隆五十年日食四十八有逾九分者止七次而本年幾於食既正值冬至以前爲剝盡純陰之候又值望日月食與尋常災異不同請飭廷臣修省略言皇上御極以來孜孜圖治求言求才之詔屢下而盜賊未平干戈未息國用未足民困未蘇在廷諸臣非不循分供職而遲回慎重之意多奮發振興之意少因而莅官行政鹵莽粗疏之弊少游移遷就之弊多執持不定則號令之頒忽行而忽止擔當不足則補救之術愈合而愈離行一事牽制而不前發一議觀望而不決廷臣首尾兩端疆臣亦互相推諉大員委蛇容悅屬員亦專務趨承敬請我皇上因日食修省嚴飭廷臣將平日取巧之積習一旦悚然改悔事可行則行勿泥成例費可節則節勿避衆怨人可舉則舉勿限資序法可改則改勿憚更張總期合力振行銳意奮興略浮華而一本肫誠破情面而大彰公道深究利害確定是非人人有實心斯事事有實效而天災可弭矣更有請者天之示譴正所以仁愛人君而諸臣之振興尤賴皇躬



之率作聖祖仁皇帝親政卽以藩鎮河工漕運三事大書於宮中楹柱出入觀覽康熙二十五年以前無日不命儒臣進講單日講經雙日講史無稍閒斷逐日御門聽政與內閣六部商推政事每逾午刻是以能定亂致治臣願皇上勤政親賢上法聖祖恭敬撙節近法宣宗道光三十年間停土木裁貢獻撤三山陳設罷一切游觀廣儲司積有盈餘內務府絕無興作誠以潤色鋪張之舉甚不可也且人情偶有所偏卽有所溺逸欲之萌初不在大魏徵之論十思蘇軾之陳三事皆防微杜漸意至深遠願皇上動心忍性居安思危戒游觀卻玩好有以宴安逸樂之說進者立斥其人而暴其罪而後延訪羣臣勤恤國事事之大者必經聖心確加考察洞悉其中曲折而後與二三大臣審定而斷行之若倉猝裁決取必立談之間則不能無率誤者勢也至用人黜陟之權操之自上賢否忠佞之分途辨之不可不早斷之不可不速知其忠矣必顯任之使得行其志知其佞矣必顯斥之使不得售其欺並容姑置一旦受其欺而不覺未有不伸彼而絀此者矣因武備之不修而留意戎行不可使人見有重武輕文之意因臣下之多蔽而別寄耳目不可使人售其逢迎揣測之私輔相之職當助人主出謀發慮故須委任責成使得

展布盡其心力而後責其效與不效否則大臣以箝口結舌爲得計轉可諉過於君而其後將有叢脞之患尤不可不切戒也又聞帝王之學不類儒生風雲月露之詞書畫藝能之末皆非爲治之先願皇上恭覽實錄之餘多讀有益之書如上年儒臣所錄朱子全書係故大學士李光地承修經聖祖仁皇帝逐條斟酌內聖外王理無不貫必須息心靜觀切己體察方爲有益並聞故大學士杜受田曾爲皇上講解資治通鑑首尾二周此書尤切於實用凡治亂興衰之故賢奸忠佞之情無微不照伏見我皇上眷懷舊學於杜受田身後飾終之典有加無已必於杜受田生前啟沃之言紬繹不忘但使聖學日進於高明則治亦日臻上理矣上嘉納之尋遷都察院左副都御史十二月以捐輸軍餉下部優敘三年二月陞刑部左侍郎四月惇衍奏豐工決口後小民流離失所江蘇之清河宿遷邳州山東之滕縣魚臺嘉祥等處所在民多餓殍屍骸徧野請飭兩河總督江蘇巡撫分飭地方官督同紳士耆老廣置義塚殮埋並被賊滋擾地方慘遭屠戮亦請飭屬掩骼得旨允行又奏閩粵商賈運米至津請豫定價值以廣招徠並請將各省援例報捐均歸併捐輸覈算援照山西等省酌加學額中額下部議行尋奏保廣東在籍

兵科給事中蘇廷魁等數員堪任籌辦軍餉事宜令其各舉所知互相敦勸仍飭地方官各於所屬延訪公正紳耆就近督同勸諭詔如所請五月以特旨交審之要犯劉秋貴受刑後因病身死郎中陳魯等未能審出實情屬令提牢捏報日期事發惇衍坐失察降一級留任時髮逆鷓張長江一帶盡爲所據湖北按察使江忠源失利於石鎮惇衍奏南方大股賊匪以水路爲巢穴必思所以禦之之法然後可直擣中堅請飭曾國藩再練楚勇數千就近由湖南移紮武昌爲江忠源聲援以杜賊匪窺伺荆襄之意又賊竄江西界連廣東請飭掌工科給事中蘇廷魁在籍召募粵勇進援江西安徽與河南接壤河南與湖北接壤勢均扼要請命幫辦安徽軍務袁甲三就近回河南原省勸諭捐輸以防搶匪並會同已革兩廣總督徐廣縉辦理召募事宜仍令袁甲三往來堵剿於鳳潁之間以遏賊北竄並將蘇廷魁袁甲三兩員上請溫諭褒勉或賞加卿銜令其便宜從事報聞六月充考試漢教習閱卷大臣九月充磨勘默寫武經大臣尋命隨同惠親王辦理巡防事宜十一月調戶部左侍郎兼管三庫事務命赴通州會同戶部左侍郎全慶等清查通濟庫款旋充實錄館副總裁又以戶部奏收京城房租惇衍奏請停止允

之五年四月山東荏平馮官屯踞匪蕩平直境肅清惇衍以巡防宣力下部優敘七月丁父憂回籍七年英人背約陷廣東省城並劫總督葉名琛以去命偕在籍太常寺卿龍元儋給事中蘇廷魁集團剿辦八年惇衍等移紮花縣密籌布置十年英事議和十一年命來京聽候簡用旋擢都察院左都御史同治元年以廣東巡撫耆齡御史華祝三等先後疏劾兩廣總督勞崇光任用非人調度乖方各款命偕廣州將軍穆克德訥密查三月惇衍等查實奏覆勞崇光下部嚴議七月到京旋陞戶部尙書八月充順天鄉試副考官閏八月疏請京外一體薦舉人才略言皇上求賢若渴半載有餘應詔者甚屬寥寥卽有登諸薦牘者或由他省督撫保舉必待本省給咨始能赴部非所以示虛懷延攬之道也且但令封疆大吏保舉而未及京卿恐馴致外重內輕不可不防其漸內閣六部九卿等官皆皇上簡用重臣素所親信必俾其各舉所知將來衆正盈廷然後可反危爲安轉亂爲治請不必限以時日拘以人數但有操守廉潔才猷卓越者卽許隨時專摺特保儻所薦之人將來或犯有貪污劣迹必惟舉主是問奏入上是之又奏庫銀支絀支放不敷各省欠款纍纍請擇其稍爲完善之區嚴定數目趕緊解京以杜推諉並

明定膜視京餉處分儻任意遲延卽從嚴參辦如所請行旋因安徽巡撫李續宜  
丁憂回籍皖省軍情緊要請諭令赴任視事從之十月奏沂畿米糧短絀請飭下  
各省督撫勸諭商民自行採買由海運津聽其銷售並加恩普免稅課無論產米  
及齎赴處所一律無庸捐釐下部議行尋賜紫禁城騎馬十二月充經筵講官二  
年二月舉郎中王家璧雲南鹽法道吳惠元等請交直隸差委詔吏部調取引見  
三月兼署都察院左都御史三年正月請疆吏加意倉儲倉穀非賑飢不能出糶  
無論官倉民倉未動之穀不得變價提用至倉穀已缺紳民捐資彌補者尤應加  
意保全下所司議行二月命查東陵西陵工程八月充順天鄉試副考官四年四  
月署翰林院掌院學士閏五月因伊犁參贊大臣聯捷御史陳廷經先後疏劾陝  
西布政使林壽圖燕處銜齋沈灑於酒巡撫劉蓉初任封疆未諳公事舉劾半聽  
林壽圖以致物議沸騰命偕協辦大學士瑞常赴陝查辦八月惇衍等遵查參劾  
各款均無確據惟於屬員赴任撤任各節多未允協奏覆部議林壽圖鑄級劉蓉  
奪職留任尋陝甘總督楊岳斌奏陝西紳士雷致福等稟稱劉蓉自到任以來疊  
遇賊匪竄近省垣派兵剿辦地方得以安堵並林壽圖實心任事各情奏入復命

偕瑞常將劉蓉林壽圖品行才具及平日居官聲名辦理軍務吏治各事宜據實覆奏十月奏言劉蓉秉性樸直辦理甘省潰勇不動聲色悉臻妥善陝省偏近甘肅回逆屢經竄擾賴有練勇數千分布要隘居民恃以無恐林壽圖身任藩司任勞任怨其日行公事俱係親自標判極爲勤奮惟參劾屬員考語間有輕重失當以致謗毀而其廉潔之操究不能稍加訾議得旨劉蓉著仍帶革職留任處分署理陝西巡撫降調陝西布政使林壽圖著來京另候簡用十一月奏請慰留四川總督駱秉章略言駱秉章德威昭著遠邇畏懷其能用賢也則左宗棠黃倬劉蓉朱孫詒等咸出幕中其能滅賊也則以石達開之驍悍兇狡不動聲色殲剿無餘及飛章告捷復不鋪張揚厲以自伐其功偉量虛懷尤非當世豪傑所及況湘勇之駐川者不少該督恩澤被楚實深雖因經費支絀不能給餉湘勇毫無怨言在他人名望稍輕者豈能鎮壓若該督堅持前議以疾爲解請仍降恩旨或再給假或卽起復以順輿情而洽士論儻萬不能留該省軍務未竣勝任愉快者頗難其人或前任江西巡撫沈葆楨可令墨經從戎至大江南北善後事宜有曾國藩提綱挈領則湖南巡撫李瀚章廣西按察使嚴樹森才猷卓著均可擢遷斯土江蘇

巡撫李鴻章密邇本籍怨讟頗滋宜令統帶淮勇追擣擒匪至署理廣東巡撫郭嵩燾在任數年自知才力不逮始行疏辭自與京職相宜又奏人才不可終棄因臚舉候補四五品京堂汪承元前任太常寺卿湯修已革侍郎杜翰已革陝西按察使張集馨前任浙江鹽運使朱詒孫已革侍郎成琦已革將軍國瑞已革奉天府府尹德春已革侍郎匡源降調庶子袁保恆已革道員吳惠元等員請棄瑕甄錄諭曰羅惇衍於以上各員毫無揀擇臚列滿紙率行陳奏殊屬冒昧不知體要著傳旨申飭惇衍又以州縣各官妄設刑械私立班館等弊例有明禁近來獲犯到案往往肆意酷虐請飭嚴禁允之五年奏言軍興以來勞績與捐輸競進流品稍雜自非大吏加意提倡抑奔競進敦厚擇保一二員破格陞用以勵其餘未易使膏澤下於民也守令宜取忠信之長慈惠之師不以苛刻辯捷爲能凋敝之區尤宜認真撫字勸農興學俾民食漸足士習漸純凡好惰好奢好訟好鬪諸弊皆因地制宜悉使改革守令得人胥由大吏鼓舞而振興之耳請旨飭下直省督撫府尹於州縣中擇其循聲卓著者出具切實考語送部引見察其材具以備簡用如所請行六年兼署工部尚書翰林院掌院學士七年正月充武英殿總裁二月

命赴天津查驗海運漕米尋丁母憂回籍十三年卒疏入諭曰前任戶部尙書羅惇衍學問優長持躬恪慎由翰林洊擢正卿屢司文柄嗣因丁憂回籍茲聞溘逝悼惜殊深羅惇衍著加恩照尙書例賜卹任內一切處分悉予開復應得卹典該衙門察例具奏以示篤念耆臣至意尋賜祭葬予諡文恪子棻舉人

### 宗室肅順

宗室肅順鑲藍旗人鄭親王烏爾恭阿第六子也由應封宗室於道光十六年授三等輔國將軍委散秩大臣十九年充前引大臣二十四年命在乾清門行走二十八年署鑾儀衛鑾儀使二十九年授奉宸苑卿三十年遷內閣學士兼禮部侍郎銜咸豐二年以捐助軍需下部優敘三年正月授正黃旗蒙古副都統二月授鑾儀衛鑾儀使九月署正紅旗護軍統領充對引大臣稽察內七倉十二月復以捐助軍需下部優敘旋充考試筆帖式閱卷大臣四年三月授御前侍衛四月署正紅旗滿洲副都統陞工部左侍郎閏七月調正藍旗滿洲副都統十月調禮部左侍郎十二月署鑲白旗護軍統領五年正月以揀選正藍旗雲騎尉遺缺呈進襲官家譜錯誤降二級留任二月管理嚮導處事務充左翼監督四月授左翼前



鋒統領五月以籌辦巡防下部議敘十月護送孝德顯皇后梓宮禮成賞戴花翎十一月以恭勘慕陵工程並恭送孝靜康慈皇后梓宮奉移暫安禮成加一級尋調戶部左侍郎兼管三庫事務十二月調正白旗滿洲副都統六年署都察院左都御史七年正月實授尋署正白旗蒙古都統四月歷署正紅旗漢軍都統兵部尙書七月授正白旗漢軍都統八月陞理藩院尙書十月充大考繙譯翰詹閱卷大臣十一月賜紫禁城騎馬十二月充經筵講官八年二月歷充查城大臣崇文門副監督時順貞門不戒於火肅順以撲救出力加一級四月署工部尙書五月前大學士耆英在天津督辦洋務私自回京下王大臣議罪議以絞監候肅順輒單銜奏請正法上以肅順所奏亦未爲是令耆英自盡五月授內大臣七月充經筵講官九月調禮部尙書管理理藩院事務十月充武鄉試監射大臣十二月調戶部尙書九年二月充考試繙譯助教閱卷大臣以各卷字畫未工奏請另試並請初次各員不准與考允之先是大學士柏蔭充順天鄉試正考官失查家人斬祥舞弊上褫柏蔭職命肅順會同刑部審訊至是斬祥已病死肅順遽就各供情節條上之奏請將柏蔭斬決上以情雖可原法難寬宥乃如所請四月署正白旗

領侍衛內大臣七月充考試繙譯助教閱卷大臣八月以錢局裁鑪減卯致鐵錢壅滯交部議處九月充繙譯鄉試正考官十月充稽察溝渠河道大臣命在御前大臣上學習行走先是戶部奏定設立乾字官號四處與五字字官號經管收發兵餉等款嗣派員覈對寶鈔處五字欠款與官錢總局所立存彙不符肅順奏請查辦至是復奏參清結五字官號司員朦混辦彙將官款化爲私欠請將司員臺斐音王正誼李守愚榮溥吳廷溥李壽蓉鳳山賈銘慎等褫職商人張兆麟等革職嚴訊一時司員商戶等被鈔沒者數十家並請嚴究失察之戶部各堂官肅順自以未經書彙獨邀免議焉旋充後扈大臣十一月管理三庫事務充考試筆帖式閱卷大臣十二月充八旗值年大臣十年正月授御前大臣充經筵直講先是直隸各州縣燒鍋稅銀由各州縣呈交彙齊解部嗣因延不報解經戶部奏定令各商戶在部交銀二月肅順奏言商戶等業經在部交課而各州縣仍復縱容差役任意需索請飭下直隸總督順天府尹確切查明參辦允之閏三月署領侍衛內大臣旋奏參官票所官吏交通請褫關防員外郎景雯等職並查鈔各官吏家產備抵四月命修理戶部衙署先是戶部不戒於火延燒北檔房司務廳俸餉處

八旗司肅順疑人役縱火逮書吏王載錫等五人下部嚴訊並奏參司務廳掌印員外郎舒度等解任候質均從之五月充總管內務府大臣七月管理上駟院署鑲紅旗漢軍都統尋調鑲黃旗漢軍都統八月扈駕幸木蘭十二月命以戶部尚書協辦大學士十一年二月戶部郎中呂賡南被參後乞內閣私撤參摺經留京王大臣奏請將中書文林照例議處肅順以僅與議處不足以昭炯戒請褫文林職侍讀文綱等毫無覺察一併下部嚴議從之六月佩帶內務府印鑰七月署領侍衛內大臣是月文宗顯皇帝升遐穆宗毅皇帝卽位命恭理喪儀初文宗顯皇帝感患暑瀉疾大漸召見載垣端華肅順諸人承寫硃諭立皇太子及上卽位肅順遂以贊襄政務自居事多專擅御史董元醇奏請皇太后垂簾聽政肅順梗其議並屢阻回鑾及交結太監杜雙奎袁添喜諸不法事九月上回京諭曰上年海疆不靖京師戒嚴總由在事王大臣等籌畫乖方所致載垣等復不能盡心國事徒以誘獲英國使臣塞責以致失信於各國淀園被擾我皇考巡幸熱河聖心萬不得已之苦衷也嗣經總理各國事務衙門王大臣將各國應辦事宜妥爲經理都城內外靜謐如常皇考屢詔王大臣議擬回鑾之旨而載垣端華肅順朋比爲

奸總以外國情形反覆力排衆論皇考宵旰焦勞更兼感受口外嚴寒聖體違和竟於本年七月十七日龍馭上賓朕呼天搶地五內如焚回思肅順等蒙蔽欺罔之罪實天下人民所痛恨者也朕御極之初卽欲重治其罪惟思伊等係顧命之臣故暫行寬免以觀後效孰意八月十一日朕召對載垣肅順等八人適有御史董元醇一摺內稱請皇太后權理國政又請於親王中簡派一二人令其輔弼於大臣中簡派一二人充朕師傅以上三端深合朕意雖我朝向無皇太后垂簾之儀但朕受皇考大行皇帝付託之重惟以國計民生爲念豈能拘守常儀特面諭載垣等著照所請傳旨該王大臣等奏對時曉曉置辯已無人臣之禮擬旨時又陽奉陰違擅自改寫作爲朕旨頒行是誠何心載垣等每以不敢擅專爲詞此非專擅之實蹟乎總因朕在沖齡皇太后不能深悉國事伊等任意欺蒙能盡欺天下乎伊等辜負皇考深恩朕若再事姑容何以仰對在天之靈又何以服天下公論載垣端華肅順著卽解任景壽穆蔭匡源焦祐瀛著卽退出軍機處派恭親王會同大學士六部九卿翰詹科道將伊等應得罪名分別輕重按例秉公具奏至應如何垂簾之儀一併會議具奏尋命睿親王仁壽醇郡王將肅順拏問交宗人

府議罪諭曰前因載垣端華肅順等三人種種跋扈不臣朕於熱河行宮命醇郡王繕就諭旨將載垣等三人解任茲於本日特旨召見恭親王奕訢帶同大學士桂良周祖培軍機大臣戶部侍郎文祥乃載垣等肆言不應召見外臣擅行攔阻其肆無忌憚何所底止前旨僅與革職實不足以蔽辜著恭親王奕訢桂良周祖培文祥卽行傳旨將載垣端華肅順革去爵職拏問交宗人府會同大學士六部九卿翰詹科道嚴行議罪肅順奉到諭旨咆哮不服並沿途私帶眷屬事聞諭曰前因肅順跋扈不臣招權納賄種種悖逆當經降旨將肅順革職派睿親王仁壽醇郡王卽將該員拏交宗人府議罪乃該革員於接奉諭旨之後咆哮狂肆目無君上悖逆情形實堪髮指且該革員恭送梓宮由熱河回京輒敢私帶眷屬行走尤法紀所不容所有肅順家產除熱河私寓令春佑嚴密查鈔外其在京家產著卽派熙拉布前往查鈔毋令稍有隱匿是月王大臣等議上諭曰宗人府會同大學士六部九卿翰詹科道定擬載垣等罪名請將載垣端華肅順照大逆律凌遲處死一摺載垣等朋比爲奸專擅跋扈種種情形均經明降諭旨示知中外載垣端華肅順於七月十七日皇考升遐卽以贊襄政務王大臣自居實則我皇考彌

留之際但面諭載垣等立朕爲皇太子並無令其贊襄政務之諭伊等乃造作贊襄名目諸事並不請旨擅自主持卽兩宮皇太后面諭之事亦敢違阻不行御史董元醇條奏皇太后垂簾事宜載垣非獨擅改諭旨並於召對時有伊等贊襄朕躬安能聽命於皇太后伊等請皇太后看摺亦係餘多之語當面咆哮目無君上情形不一而足且每言親王等不可召見意存離間此載垣端華肅順之罪狀也肅順擅坐御位進內廷出入自由目無法紀擅用行宮內御用器物於傳收應用物件抗違不遵並自請分見兩宮皇太后召對詞氣之間互有抑揚意在搆毀此又肅順之罪狀也一切罪狀均經母后皇太后聖母皇太后面諭議政王軍機大臣逐款開列傳知會議王大臣等知悉茲據王大臣等按律擬罪將載垣端華肅順凌遲處死當卽召見諸王大臣詢以載垣等罪名有無一綫可原僉稱載垣端華肅順跋扈不臣均屬罪大惡極於國法無可寬宥並無異詞朕念載垣等誼屬宗支身罹重罪均應棄市能無下淚且載垣等前後一切情形顯屬欲危社稷是皆列祖列宗之罪人非獨欺陵朕躬爲有罪也在伊等自恃係顧命大臣縱作惡多端定邀寬宥豈知贊襄政務皇考並無此諭若不重治其罪何以仰副皇考付

託之心亦何以飭法紀而示萬世卽照該王大臣所擬均卽凌遲處死亦屬情眞罪當惟國家本有議親議貴之條尙可量從未減姑於萬無可貸之中免其肆市載垣端華著加恩賜令自盡卽派肅親王華豐刑部尙書綿森迅卽前往宗人府空室傳旨令其自盡此爲國體起見非有私於載垣端華也至肅順悖逆狂謬較載垣等尤甚本應凌遲處死以伸國法而快人心惟朕心究有所未忍著加恩改爲斬立決卽著睿親王仁壽刑部右侍郎載齡前往監視行刑以爲大逆不道者戒肅順遂棄市是月復諭曰前因太監杜雙奎有與肅順交結情事交慎刑司審訊茲據總管內務府大臣督飭該司員等審明定擬並究出太監袁添喜等均有與肅順來往之事肅順結交近侍心存叵測該太監等迫於威馭意存迎合均屬罪由自取見已將杜雙奎等從重懲辦此外自無庸再事株求以昭寬大同治四年五月都察院奏耆英之子已革馬蘭鎮總兵慶錫等爲父鳴冤得旨耆英因桂良等奏請令該員回京乃不候諭旨擅自折回冒昧糊塗實屬自速其死所有慶錫等呈請代爲鳴冤懇恩昭雪之處著毋庸議惟肅順因意見不合單銜奏請卽行正法原奏內稱苟延年月尙以病亡獲保首領等語措詞不倫在肅順當時無

非欲藉此攬權立威使朝臣莫敢誰何以遂其罔上行私之計業經欽奉硃諭駁斥肅順亦因另案正法肅順之子著不准其出仕以昭炯戒

陳孚恩

陳孚恩江西新城人由拔貢生於道光六年朝考一等以七品小京官用分吏部十二年陞額外主事十三年充軍機章京十七年補主事十八年陞員外郎二十年四月陞郎中五月奉旨以四品京堂用六月擢太僕寺少卿二十二年三月授通政使司副使四月陞太僕寺卿均留軍機章京行走十月遷大理寺卿二十三年兼署順天府尹二十四年授都察院左副都御史二十五年九月充武殿試讀卷官十二月署工部右侍郎兼管錢法堂事務二十六年九月署倉場侍郎十二月實授二十七年五月命署兵部左侍郎並在軍機大臣上行走十一月以御史毛鴻賓奏山東庫款虧短命偕戶部左侍郎柏葰前往查訪旋覆奏將庫款覈實封存又以御史陳壇等奏山東盜賊公行捕務廢弛仍命與柏葰嚴密查辦尋查出搶案與原參相符者共十六件奏聞命暫署山東巡撫旋授刑部右侍郎十二月回京二十八年諭曰陳孚恩前在署山東巡撫任內於公費等項一概不收



清正可嘉之至著賞給頭品頂戴並著在紫禁城騎馬復賜清正良臣扁額二十九年正月京察下部議敘閏四月命偕戶部右侍郎福濟赴山西查辦事件六月奏訊明巡撫王兆琛收受節禮屬實論如律七月調工部左侍郎八月署戶部左侍郎兼管三庫事務十一月署刑部尙書十二月實授三十年正月宣宗成皇帝升遐二月會議升配升祔典禮怡親王載垣等奏言召對時與陳孚恩語言辯論舉措失儀自請嚴議諭曰爾等雖失小節究屬忠悃之誠而陳孚恩雖爲廣言起見於大體實屬乖謬均著交各該衙門議處尋部議孚恩革職留任五月以親老多病奏請開缺回籍侍養允之咸豐二年七月以捐助軍餉下部議敘九月粵逆竄擾江西命孚恩幫辦團防事務三年正月賊陷九江郡城巡撫張芾前往剿辦復命孚恩與司道等守護省城時逆匪竄擾安徽滁州一帶官軍分路截擊上慮該逆回竄上游命孚恩與張芾等各就地方情形擇要布置六月逆匪回竄江西省城孚恩與張芾等督兵迎擊斃賊甚衆翼日賊攻德勝門轟塌城牆蠡擁而上官軍力奪缺口賊敗走上嘉獎之七月賊復攻城調派總兵馬濟美等下城兜剿毀其壘賊復以入股撲營濟美陣亡孚恩率勇抵禦敗之尋畫水陸夾攻之策賊

大窘遂遁捷入賞戴花翎四月逆匪復圍省城孚恩等竭力堵剿解其圍五年丁母憂七年服闋到京八年三月御史錢桂森奏言陳孚恩才具練達識見明通邇來在外數年多所閱歷尤能洞悉外間情弊比者粵寇未平海疆多擾倘仍命其入直樞廷必能剖決機宜否則授爲欽使俾其專辦洋務亦必能揆時度勢剛柔交濟疏入上以桂森朋比黨援不勝御史之任著回原衙門行走七月命以頭品頂帶署兵部右侍郎八月調署左侍郎九月署禮部尙書旋授兵部尙書十一月以順天鄉試關節案發上派孚恩會同審訊嗣因案內牽涉伊子陳景彥遞送條子嚴詰得實自請嚴議並請迴避得旨刑部員外郎陳景彥著卽革職陳孚恩並不知情著改爲交部議處此案關涉陳景彥之處陳孚恩著照例迴避餘仍秉公會審無庸迴避全案旋經部議降一級調用准抵銷九年三月兼署刑部尙書八月兼署戶部尙書十二月管理三庫事務十年八月上巡幸熱河九月調吏部尙書十一年文宗顯皇帝升遐穆宗毅皇帝御極載垣等矯詔令孚恩赴行在尋載垣等獲罪詹事府少詹事許彭壽以孚恩爲載垣等黨援形蹟最著奏請查辦諭曰陳孚恩於上年七月大行皇帝發下硃筆命諸臣會議巡幸熱河是否可行陳

孚恩卽有竊負而逃遵海濱而處之語其意在迎合載垣等當時會議諸臣無不共聞大行皇帝龍馭上賓滿漢大臣中惟令陳孚恩一人先赴行在是該尙書爲載垣之心腹卽此可見聲名如此狼籍品行如此卑污若任其濫廁卿貳何以表率僚屬著革職永不敘用初睿親王仁壽等會議郊壇配位典禮孚恩聲稱道光三十年大行皇帝以三祖五宗爲定之旨係大學士杜受田所擬仍請以大行皇帝配祀至是許彭壽等引據大行皇帝聖製詩有以後無須再變更之句請飭王大臣再議尋議不配祀仁壽等以前主配祀之議係受孚恩語言朦混入奏諭曰郊壇配位大典攸關爲臣下者宜如何援據禮經敬謹詳擬乃陳孚恩以荒誕無據之詞冀聳衆聽揣其意不過掇合仁壽等一同列銜以便其諂媚載垣等之計謬妄卑污至於此極又查鈔肅順家產內陳孚恩親筆書函有闇昧不明之語朕新政頒行務從寬大唯其與載垣肅順交往密切已屬確有證據若不從嚴懲辦何以儆示將來著派瑞常麟魁前往將陳孚恩拏交刑部卽將該革員寓所資財嚴密查鈔著派大學士周祖培軍機大臣文祥定擬罪名具奏所有前經御賞扁額著卽恭繳尋發往新疆效力贖罪同治元年到戍三年伊犁將軍常清以孚恩

當差奮勉未便沒其微勞入奏上以孚恩獲罪深重毋庸給予獎勵四年伊犁被圍常清會同新任將軍明緒奏言孚恩籌餉籌兵不遺餘力懇請釋回諭曰革員陳孚恩既在伊犁尙能出力著加恩准其釋回仍著留於伊犁幫同辦理一切兵餉事宜但能始終出力並准明緒等酌量保奏五年伊犁城陷孚恩偕其妾黃氏子景和媳徐氏孫小連同時殉難事聞得旨陳孚恩毋庸給予卹典孚恩之妾黃氏等均下部議卹

穆蔭

穆蔭托和洛氏滿洲正白旗人由官學生考取內閣中書在內閣學習道光十六年充軍機章京尋補官二十五年擢侍讀三十年京察一等覆帶引見記名以道府用咸豐元年三月命以五品京堂候補在軍機大臣上學習行走十二月授國子監祭酒部臣以穆蔭非科甲出身於例不合申請特旨仍予補授二年二月遷光祿寺卿八月擢內閣學士兼禮部侍郎銜十一月授正藍旗漢軍副都統三年二月調鑲白旗滿洲副都統三月稽察中書科事務四月署工部右侍郎兼管錢法堂事務五月充管理圓明園八旗包衣三旗官兵並烏槍營事務大臣時粵匪

分擾河南各郡畿輔戒嚴上以京師根本重地命穆蔭偕科爾沁郡王僧格林沁左都御史花沙納都統達洪阿辦理京旗各營巡防旋以錢價太昂偕僧格林沁等奏請將兵丁月餉以錢四千抵銀一兩從之六月充國史館清文總校八月管理火藥局事務九月授禮部左侍郎署右翼總兵十月命在軍機大臣上行走並賜紫禁城騎馬十一月充國史館副總裁十二月充經筵講官尋偕步軍統領聯順等奏言綠營兵丁應關春夏兩季米石經戶部飭太平倉開放迄今半年之久始據片傳領米且係累年虧朽萬難食用恐倉儲顯有弊端亟宜察覈如所議行四年兼右翼總兵八月充崇文門副監督十月調吏部右侍郎旋充實錄館副總裁五年刑部以工部右侍郎崇實家人朱二設局騙詐一案請派大員承審命偕協辦大學士賈植覆鞫得實奏聞崇實坐徇庇鐫級朱二治如律六年五月偕協辦大學士彭蘊章等奏言自粵匪竄擾長江卽經舉行團練數年以來實無大效必以官率紳以紳勸民而後如指臂之一氣請仿唐時刺史帶團練使之例以專責成下各督撫議行十月命毋庸管理火藥局七年授鑲藍旗護軍統領八年五月管理光祿寺事務十二月擢理藩院尙書時御史王德固河南巡撫瑛棨先後

奏言河南當皖鄂之衝以歸德爲藩籬信陽爲門戶請增置總兵穆蔭及大學士彭蘊章等亦以今昔不同請變通舊制用資控扼上韙之增設歸德鎮總兵一員九年二月充國史館總裁旋授正白旗蒙古都統三月署兵部尙書適欽差大臣勝保等奏推廣捐例八條部臣會議以聞命偕惠親王等覆覈尋奏言吏部議准者一候補班人員准捐候補班先用保舉人員准捐候補班一軍務省分人員准於鄰省用兵省分捐陞改捐一軍營人員准捐免赴部投供悉心酌覈並無妨礙至所奏記名道府不在捐例之內如有報效逾萬者俟奏明候旨加恩以昭慎重如所議行十月以英人竄犯內地穆蔭偕彭蘊章等奏言防外之策在築礮臺以利轟擊尤在洩水勢以遏往來南運河滄州南二十五里有向東大石牐一座牐之東見有河形若挑淤濬塞導之入海再於天津城西芥園上下開引河一道令水由城西入南窪則南運河之水可減矣北運河楊村筐兒港牐口基址尙在若一律挑通水由東淀入海而北運河之水可減矣南北運河之水旣洩而大小西河之水於天津城北西沽地方匯入北運河每遇盛漲水勢浩淼亦須設法旁洩城東稍北舊有減水河名賈家口通陳家溝入東淀略爲挑濬導之東流則西河

之水可減矣郡城東南馬家口以下亦可開通引河引水入南窪白塘口以下舊有古牯亦宜開濬則海河之水可減矣以上各口或修理舊牯或建造水壩無事則閉有事則啟來源分則下游淺海潮長落長時英船斷不能貿然直入而故道復通牯壩以時啟閉兼可以弭水患誠爲一舉兩得奏入報聞十二月調補兵部尙書稽察會同四譯館十年正月以上三旬萬壽賞戴花翎三月署吏部尙書旋署步軍統領初山東巡撫文煜以餘兵口糧請於正項內支給上以庫款支絀飭詳查缺額卽以餘兵補足毋庸例外開支文煜復以正兵奉調名糧例不開除無可移抵爲言上命速議穆蔭偕彭蘊章疏言該省鄰氛未靖尙須分兵設防若再責令另籌餉項輾轉遷延設因此貽誤轉得有所藉口請准於正項內開支仍於優贍兵食之中稍示撙節照常年減成章程覈減以七錢二分放給如所請行七月大學士桂良等辦理撫英獲咎命穆蔭爲欽差大臣偕怡親王載垣至津籌辦時英情堅狡諭曰巴夏禮威妥馬係英人謀主聞明常亦暗隨在內卽著將各該領羈留在通毋令折回以杜奸計並著該大臣毋庸接見以崇體制八月穆蔭等至通與該領定約該領堅欲親遞國書奏入上震怒命擒額爾金等至京該領等

馳歸僧格林沁大軍邀獲之逮至都尋以穆蔭等辦理不善撤去欽差大臣九月以隨扈熱河昕夕在公賞穿黃馬褂旋丁父憂上以軍機處事務較繁給假十四日經理喪事回京後補行穿孝十一年七月穆宗毅皇帝御極以怡親王載垣等竊奪政柄穆蔭不能力爭命退出軍機交王大臣等議罪十月議上諭曰穆蔭等於載垣等竊奪政柄不能力爭均屬辜恩溺職穆蔭在軍機大臣上行走最久班次在前情節尤重王大臣等擬將穆蔭革職發往新疆效力贖罪咎有應得惟以載垣等兇殘方張受其箝制均有難與爭衡之勢其不能振作尙有可原兵部尙書穆蔭著卽革職加恩改爲發往軍臺效力贖罪同治二年十一月穆蔭繳清臺費兵部以聞命俟扣滿三年釋回十年故子齊芬戶部筆帖式齊蘭掌京畿道監察御史

恆祺

恆祺伊爾根覺羅氏內務府滿洲正白旗人由官學生於道光五年挑補奉宸苑拜唐阿七年委署苑副十三年授苑副十八年陞苑丞十九年陞六品苑丞二十一年陞員外郎二十二年擢郎中二十六年遷驍騎參領三十年五月署奉宸苑



卿十二月充管理溝渠河道大臣咸豐二年京察一等記名三年捐修南苑圍牆賞戴花翎四年充粵海關監督自三年至五年歷次捐助軍餉先後下部優敘尋命接管粵海關稅務六年捐輸紅單船經費並捐辦硝磺賞加布政使銜七年英人竄入廣東省城偕廣州將軍穆克德訥等奏聞諭曰粵海關監督恆祺等雖均有疏防之咎惟該督等未與會商尙有可原所請嚴加治罪之處著加恩改爲交部議處八年以先後在廣東天津捐輸軍餉命開郎中缺以三苑卿候補並賞給內務府大臣銜六年至是年疊命接管粵海關稅務九年差竣詔暫留廣東會同巡撫勞崇光辦理通商事宜十年二月補武備院卿五月差滿旋京召見二次九月命辦理海口通商事宜十一月以辦理換約事宜出力賞給頭品頂帶十一年三月命幫辦總理各國衙門事務十月擢內閣學士兼禮部侍郎銜賜紫禁城騎馬十一月補鑲紅旗蒙古副都統同治元年二月署鑲黃旗蒙古副都統四月署鑲白旗護軍統領六月陞理藩院右侍郎閏八月調刑部右侍郎九月暫署管戶部三庫事務十一月轉工部左侍郎二年充右翼監督三年八月兼署理藩院右侍郎九月署鑲白旗滿洲副都統十一月充勘估東陵西陵歲修工程大臣十二

月授右翼總兵尋以右翼監督任內盈餘銀兩未能足額部議罰俸上以恆祺收額內盈餘銀數在一分以上免其置議四年七月充崇文門副監督九月充前引大臣旋調鑲白旗滿洲副都統文宗顯皇帝孝德顯皇后奉安定陵禮成賞加二級並賞其子樂昌主事十月充管八旗新舊營房大臣十一月管火藥局併充八旗值年大臣旋因火藥局不戒於火轟塌房屋恆祺以失察下部議處五年命往東陵西陵勘估工程旋卒遺疏入諭曰頭品頂戴工部左侍郎恆祺辦事勤奮由司員洊陞卿貳宣力有年方冀長資倚畀茲聞溘逝軫惜殊深加恩著照尙書例賜卹任內一切處分悉予開復應得卹典該衙門察例具奏其崇文門任內應賠銀兩著加恩豁免伊子主事樂昌著加恩賞給員外郎俟及歲時分部學習行走尋賜祭葬

### 基溥

基溥李氏內務府漢軍正白旗人嘉慶二十一年補筆帖式道光六年委署主事十二年授六品庫掌十四年陞員外郎十八年陞郎中旋授驍騎參領十九年充蘇州織造二十年差竣回京二十一年補郎中授驍騎參領二十二年陞坐辦堂

郎中二十六年二月京察一等復帶引見記名以關差道府用閏五月擢奉宸苑卿六月充粵海關監督時華洋各商虧缺資本貨物壅滯粵關所收稅銀較前短少四十萬兩零基溥與兩廣總督徐廣縉據實奏聞二十九年差竣回京三十年二月恭辦昌西陵工程五月陞總管內務府大臣七月授正藍旗漢軍副都統咸豐元年正月署正藍旗護軍統領二月授鑲白旗蒙古副都統十月署正藍旗漢軍副都統二年正月賜紫禁城騎馬旋署刑部右侍郎三月宣宗成皇帝奉安禮成以基溥在事恪恭敬慎賞加二級四月署鑲黃旗護軍統領十月以捐備軍需命交軍機處存記十二月充八旗值年大臣署鑲紅旗滿洲副都統三年三月以孝和睿皇后奉安禮成基溥在事恪恭敬慎賞加二級六月續捐軍需九月授正白旗滿洲副都統署刑部左侍郎兼署正藍旗護軍統領十月充查收河工大臣十二月以捐備軍需下部議敘旋充管理溝渠河道大臣復以歷次捐備軍需下部優敘四年二月以承審刑部主事王式言聽囑妄斷一案未能從重定議含混入奏下部議處三月命偕李鈞等採買米石旋查明北新倉開放米石有攙和情弊請將花戶薛起祥等交部嚴訊尋補刑部右侍郎四月充紫禁城值年大臣閏

七月授正藍旗護軍統領十二月以值班疏忽致不知姓名人犯混入宮禁自請從重治罪得旨切責革去刑部右侍郎總管內務府大臣正藍旗護軍統領正白旗滿洲副都統一切差使全行革退五年二月授太僕寺卿三月陞都察院左副都御史四月署戶部左侍郎兼管三庫事務六月陞工部右侍郎兼管錢法堂事務七月授鑲紅旗蒙古副都統十一月賜紫禁城騎馬六年三月署理都察院左都御史五月以倡率監督等官捐資修築錢法堂寶源新舊兩局下部議敘六月以站班遲誤罰俸半年十月管理火藥局事務七年正月調戶部左侍郎兼管三庫事務四月以辦理孝靜康慈皇后奉安禮成賞加二級復署正藍旗護軍統領並管理新舊營房閏五月署左翼前鋒統領八年四月署正藍旗護軍統領六月授鑲白旗護軍統領九月上閱看八旗槍操以基溥訓練認真傳旨優獎並下部議敘九年以辦理清結五字奏稟將革商虧短應追官款作爲私欠基溥於畫稟時未能查出下部議處尋調兵部右侍郎十年調吏部右侍郎復授正紅旗滿洲副都統十一年充左翼監督同治元年三月以帶領引見到班遲誤命交都察院照例議處閏八月轉補吏部左侍郎十二月充經筵講官三年六月署鑲白旗蒙

古副都統八月署正藍旗滿洲副都統十月充各省繙譯鄉試閱卷大臣十一月署正黃旗漢軍副都統四年八月充監試武舉覆試大臣九月文宗顯皇帝奉安禮成基溥在工敬慎將事賞給頭品頂帶並賞戴花翎五年復充紫禁城值年大臣六年卒遺疏入諭曰吏部左侍郎基溥由司員洊陞卿貳辦事妥協克勤厥職茲聞溘逝殊深軫惜加恩著照侍郎例賜卹任內一切處分悉予開復應得卹典該衙門察例具奏尋賜祭葬子鍾文山東候補道繼芳戶部主事

### 明善

明善索氏內務府漢軍正黃旗人道光三年由監生補內務府筆帖式十八年五月補委署主事六月陞堂主事十一月陞員外郎二十二年擢郎中二十五年充蘇州織造二十八年二月補驍騎參領十二月充粵海關監督咸豐二年五月調坐辦堂郎中十二月捐備軍餉賞戴花翎三年續捐軍餉並隨同內務府大臣基溥等捐資辦理內城各堆撥守禦器械下部議敘四年陞武備院卿六年賞二品頂帶八年順貞門內及景運門內五間房先後不戒於火明善以撲救出力加二級十年二月授總管內務府大臣三月敕辦理萬年吉地工程閏三月授正白旗

漢軍副都統五月管理精捷營樂部事務署正藍旗滿洲副都統六月管理寧壽宮武英殿事務署鑲紅旗滿洲副都統十一年調鑲藍旗滿洲副都統同治元年十月賜紫禁城騎馬十二月充八旗值年大臣二年二月充紫禁城內值年大臣七月因呼倫貝爾總管員缺揀選應陞人員奏辦遲延下部議處八月署武備院印鑰十一月充左翼監督三年署鑲黃旗護軍統領四年四月管理茶膳房事務五月調正藍旗滿洲副都統九月文宗顯皇帝孝德顯皇后永遠奉安定陵禮成賞頭品頂帶並其孫增榮主事五年充崇文門副監督六年敬事房不戒於火明善撲救出力加三級七年授工部右侍郎兼管錢法堂事務八年六月武英殿不戒於火上以明善失於防範降二級留任十月偕署右侍郎于淩辰查出寶源局鑪頭孫鳳起有私鑄情弊請下部治罪允之九年三月充管理溝渠河道大臣六月充紫禁城內值年大臣十年轉左侍郎十一年七月以內務府請撥戶部銀兩不敷用款未經奏明添撥司員英綬等卽出具印領文稿意存朦混遽行呈堂標畫事覺經總管內務府大臣崇綸等明白迴奏諭曰明善於英綬等咨行戶部請領銀兩不加查察隨同標畫亦屬疏忽著交部察議九月上以大婚禮成賞加太

子少保銜十一月以疾請開茶膳房等差使允之十二月復充管理溝渠河道大臣十二年上謁東陵明善隨扈充帶豹尾槍大臣以車兩差使未能妥爲照料且有攙越豹尾槍行走之處上責其疏忽下部議處尋命辦理普陀峪萬年吉地工程十三年七月御史陳彝奏內務府大臣辦事欺朦請予處分諭曰革員李光昭報效木植種種欺罔總管內務府大臣於該革員先後具呈時並不詳查駁詰遽爲陳奏實屬辦事欺朦咎有應得明善著交部議處部議褫職上加恩改爲革職留任八月署正黃旗滿洲副都統十二月卒遺疏入諭曰工部左侍郎明善由內務府司員洊陞卿貳補授總管內務府大臣辦事熟練克勤厥職茲聞溘逝軫惜殊深著加恩賞給陀羅經被晉贈太子太保銜照尙書例賜卹任內一切處分悉予開復應得卹典該衙門察例具奏尋賜祭葬子文錫前任總管內務府大臣孫增崇增德均內務府候補郎中增榮主事

### 勝保

勝保蘇完瓜爾佳氏滿洲鑲白旗人由官學生考取恩監生道光二十年舉人二十二年考取順天府儒學教授二十三年遷詹事府左春坊左贊善二十七年五

月大考二等陞翰林院侍講尋轉侍讀十二月擢國子監祭酒三十年臚陳時事五條一重河務詳求疏導之法二嚴海防申明鴉片之禁三整水師講肄訓練之策四察吏治痛戒因循之弊二正風俗嚴杜奢侈之習下部議行咸豐元年授光祿寺卿二年二月陞內閣學士兼禮部侍郎銜三月復臚陳時事略曰自古帝王莫不謹天戒而懷天威今默觀天意一若重有所警者前年地震川西去歲河決豐口聞本年冬月又有日食之異夫日者君象也易曰坤爲地水附於地陰數也天或者警溺職而侵官乎今春雨澤愆期自奉安大禮告成後風霾特甚安知非成皇帝在天之靈昭示我皇上乎伏願皇上懷旦明以承篤眷今天下急欲求治必先求致治之人廣西賊匪起事以來未嘗挫衄視官兵如兒戲自出永安猖獗尤甚桂梧平潯在在堪虞此廣西之憂也賊伏永安數月必有注意之所梧州一府爲兩省咽喉若賊據梧州分掠桂平等處潛結東粵奸徒直犯肇廣旁煽南贛遠結漳泉近糾海口自嶺以東將不可問此廣東之憂也桂林接壤湖南平日奸徒本通消息若擾桂林浮湘而下盜衡永犯長沙此湖南之憂也河決未復數千萬赴工之人皆遊手無賴入春以來以工代賑今工歇而田廬依然巨浸窮無所



歸豈能待斃兼之糧幫水手素非善良今歲南糧半由海運半阻河干此輩資生無策不免冒犯科條此淮徐之憂也海盜去年窺伺山東逍遙閩浙沿海兵將未能扼其吭而蹙其勢招撫之局半屬羈縻能保不幡然易轍乎此海疆之憂也直隸山東等省春雨不時糧價頓長搶掠頻仍甚至都城內外公然械劫此畿輔之憂也各省大小官吏泄沓如故堵禦撫循均無可恃伏願皇上嚴責成以弭禍患夫予奪者人主之大柄也寬猛者馭世之大權也今以賽尙阿久任京秩處之揆席足以儀型至將略本非所長致師久無功潰圍失利然既使之典兵似不宜廢軍紀如祖宗朝處置明珠勒保阿桂岳鍾琪諸人成法具在庶失律之軍咸惕然於朝廷之法制而不敢輕上年河決特寬河員之罪乃至再誤事機尙復飾詞諉過該督並不自請治罪伏願皇上明賞罰以振紀綱竊觀刑曹輸獄往往故爲輕縱以博寬厚之名卽上年曹七一案應照光棍例擬決而僅照棍徒擬軍光棍之例遂廢至搶劫重案首從均應大辟近來僅坐爲首一二人餘皆以接贓開脫盜風日熾由於法網日疏伏願皇上明敕法以肅典常又竊見皇上於臣工奏摺時或留中或存以備覽或徐俟施行但此中流弊有不可不防者進言之人豈皆公

忠若逆知必留則報私怨而中傷沽直聲而攻訐意見已有偏私毀譽豈無真僞揣摩徼倖之風每由此起又見一切事務似硃批多而諭旨少夫果事關機密自不可豫爲傳播若尋常訓誡之詞似不妨明白宣示以息猜疑而杜私揣伏願皇上布誠信以服中外夫處高而能卑者天也至愚而難欺者民也往往宮闈深秘摺紳所未及知里巷已播之齒頰近日市井細民時或私論聖德亦知言出無稽然人言如此亦足見爲君之難而防川之不易也奏入上命軍機大臣傳旨指示摺內兩端再直陳無隱勝保復奏略曰前摺所謂硃批多而諭旨少者以硃批因事垂訓中外臣工奉到硃批不過敬謹遵行他人不得與聞非若諭旨頒示天下中外傳誦者比卽如近日諸臣條奏奉旨依議原奏之人尙不得知其奉旨交部重案覆奏依議外人並不知作何發落古者象魏懸書俾衆人咸得屬目似宜通行宣示以昭朝廷之令甲而杜胥吏之蔽欺至愚賤私論聖德一節或謂皇上勵精之心不如初政或謂勤儉之德不及先皇今遊觀之所煥然一新釋服之後必將有陶情適性之事見在內府已有採辦梨園服飾以備進御者夫鼓樂田獵何損聖德然自古帝王必先天下之憂而憂後天下之樂而樂書曰無于水監當于

民監誠不可以不察也奏入諭曰勝保奏陳時事各條朕詳加披閱所論軍務河工明賞罰以振紀綱等語與給事中陳壇所奏大略相同其所稱近日硃批多而諭旨少此言未諳政體向來各部院奏事著依所議行者卽不另降諭旨此係列聖成憲若每事必降諭旨無論勢不能行亦日不暇給矣其所稱遊觀之所煥然一新不爲無因見在重華宮小有興作若採梨園服飾以備進奉更無其事念其意存諷諫於朕修身砥行不爲無補卽不必加以妄言之罪勝保著免其置議四月因前遞封奏自行撤回經部議降三級調用時髮逆竄湖北武漢告警勝保奏籌辦賊大局略云漢陽武昌四面受敵長江環之備禦難周勢必不守揆賊所向首在金陵次則荆蜀荆蜀之患淺而遲金陵之患速而大若不豫爲籌畫萬一金陵有警則江浙數千里莫不震動且糧運梗阻所繫非淺鮮也況江淮等處飢民數十萬多係不逞之徒儻暗相勾結將滋蔓之勢成而江淮之禍亟矣京口向設水師承平日久軍政日壞今宜精選而勤練之凡水師及調到陸路各營一體教演於沿江兩岸上遊相度地勢扼要之處設立礮臺復以防江竹木鐵器橫亘中流以遏賊之東下然非得其人以策馭之則士氣不能振南人怯懦聞警卽逃今

宜無論城市廣爲勸諭令其實行團練互相守望擇紳士之有德望者董之但令自保身家官吏勿輕調遣事定之後量予獎敘然非得其人以團結之則民志不能堅查江南省城及揚鎮蘇松各郡官紳富戶居多沐浴膏澤二百餘年誰無急公好義之悃祇以不肖州縣假公營私威勒而偪取之以致情意乖隔若能開誠布公激發忠義踊躍輸將之數必有大異從前者然非上之人誠意以感孚之則於事不能濟准徐土匪公然剽劫此外鹽梟水手類多奸徒地方官畏其黨衆多方消弭若俟其糾結已成根株已固辦理較難爲力見在粵賊卽前車之鑒也應以防堵餘力兼辦境內伏莽務令不留徐孽而後已然非上之人實力以安戢之則其患不能消况金陵一帶爲南北咽喉勢更重於武昌若僅責成該省文武等恐守禦未足深恃願我皇上速簡大員馳往督辦庶可弭患於未然也奏入上命馳往河南交欽差大臣琦善差遣委用三年三月帥兵援楚復由楚入皖適安慶失守江防喫緊復命偕直隸提督陳金綬馳赴江寧與欽差大臣湖北提督向榮合力援應江寧陷遂駐紮浦口杜賊北竄尋命以內閣學士兼禮部侍郎銜幫辦軍務並諭偕琦善陳金綬同心戮力迅掃賊氛無論江南江北何處緊要即便宜

辦理嗣以揚州失守命偕陳金綬繞出賊前力遏北竄之路三月會合琦善進剿琦善移營保山勝保偕陳金綬移營司徒廟督兵由都天廟直撲鎮海寺南賊列隊相抵官軍擊走之立將賊營礮臺踏毀直薄城下捷入賞戴花翎四月賊偷搭浮橋由天寧廣儲二門突出官軍奮力迎擊殲賊千餘賊反走爭渡擠折浮橋墜河死者無算先是亳州失守上命勝保帶兵赴皖至是賊復由楚竄豫上命改赴河南會同巡撫陸應穀攻剿六月抵河南境會懷慶告急勝保偕欽差大臣直隸總督訥爾經額及江寧將軍托明阿貴州提督善祿已革都統西凌阿等會合進援托明阿等軍其東勝保軍其南賊分股來撲官軍槍礮齊施斃賊二千餘賊敗退旋命幫辦河北軍務七月復分兵三路進攻賊擁衆抗拒勝保令縱火賊壘阻其救援並用土草填壓濠溝揮兵直入賊大潰殲三千餘名黃衣賊目八十餘名懷慶圍解賞加都統銜並賞穿黃馬褂予霍鑾巴圖魯名號八月賊竄山西陷平陽勝保與善祿西凌阿等跟蹤追剿訥爾經額請馳回正定嚴防各路要隘旋命勝保爲欽差大臣理藩院尙書宗室恩華托明阿幫辦軍務諭曰昨命勝保爲欽差大臣各路官兵統歸節制惟軍律首貴嚴明將士方能用命勝保特膺重任總

統師于並頒給康熙年間安親王所進神雀刀由恆春齋往山西交勝保祇領如  
有不遵調遣任意遷延甚至臨陣退縮貽誤軍情者提鎮以上據實參奏副將以  
下各員弁卽著一面正法一面奏聞以肅軍令九月賊復東竄規入直隸境勝保  
由井陘一路迎截賊旋擾永年之臨洛關及正定一帶上以勝保督追不力降二  
級留任賊由晉州深州越獻縣竄近天津勝保跟蹤追剿至靜海縣賊由獨流分  
踞楊柳青地方經官軍節次鈔擊遂全數竄踞靜海獨流兩處勝保帶兵直抵獨  
流賊傾巢出撲官軍分東西兩岸衝殺賊衆披靡勝保旋赴下西河一帶相度地  
勢賊乘隙分股來撲副都統佟鑑知縣謝子澄均戰歿上以勝保身爲統帥何以  
離營半日卽至將士不遵調度輕率進兵所稱號令嚴明者安在著降四級留任  
拔去花翎十二月官軍增築礮臺逼近賊營賊擁出二三千人來撲官軍分兩翼  
迎擊大敗之賊旋復傾巢衝出勝保督大隊直出陣前各兵勇爭先衝殺又敗之  
時欽差參贊大臣科爾沁郡王僧格林沁駐兵永清王慶坨上命移營前進與勝  
保合爲一軍併力進剿四年正月進攻獨流斃匪無算餘匪旋竄至舒城村一帶  
復竄入獻縣及阜城縣城節經官軍剿洗斃匪三四千名並射殺逆首吉汝洸等

皖省另股賊匪尋由豐工偷渡黃河擾山東金鄉等處上命勝保星速統兵進剿賊尋竄入臨清上以勝保督率無方褫其職令帶罪自效既復分軍爲三同時並進親督馬隊列陣以待並密遣練勇潛行過河向賊巢拋放火彈城中賊衆驚亂官軍乘勢撲入遂復臨清命開復原官餘賊仍踞豐縣勝保督隊分攻賊乘夜竄出我兵追至黃河漫口騎馬賊多陷泥淖中生擒僞丞相陳世保等賞太子少保銜並賜珍物時阜城踞匪竄至東光之連鎮復分股竄擾高唐勝保移師攻之將城外木柵燒燬賊竄入城七月以圍攻高唐不克拔去花翎嚴旨申飭閏七月革職仍令迅圖收復五年正月諭曰勝保剿辦高唐逆匪日久無功前經拔去花翎並降旨革職責令迅圖克復乃數月以來仍復遷延觀望以致數百餘匪日久稽誅糜餉勞師厥罪甚重著卽拏問交刑部治罪二月到京發往新疆效力十一月賞藍翎侍衛充伊犁領隊大臣六年六月召來京十一月發往安徽軍營交福濟差遣七年正月賞副都統銜幫同英桂督辦河南剿匪事宜二月攻剿方家集捻匪擒捻首錢萬榮等三十餘名又進攻烏龍集賊巢克之四月攻剿柳溝集賊匪毀其營賊竄安徽之潁上縣官軍馳援賊夜遁遂進攻三河尖之黃岡中心岡等

處斃賊無算並毀方家集王家壩小曹集車家集各賊壘並三河尖老巢阜陽一帶漸就肅清賞還花翎閏五月軍於潁上直擣河關克之七月毀正陽關附近賊巢並板橋集枸杞集劉帝城等處賊營克復霍邱縣城九月進攻正陽關又克之戮擒首魏藍奇等賞頭品頂帶八年正月埽平鄧家集喬家廟趙屯鄧家墟等處各老巢二月粵匪圍攻河南之固始偷竄地道轟塌城垣數十丈我兵併力搶護匪分股來撲官軍擊退之殲匪萬餘擒斬僞顯天侯卜占魁等固始圍解諭曰此股賊匪數以萬計圍城兩月有餘經勝保督兵援剿屢獲大勝遂解城圍實屬謀勇兼備調度有方勝保著加恩遇有都統缺出提奏並賞還黃馬褂及霍變巴圖魯名號先是勝保之弟廉保因擅用官項案內遣戍至是勝保奏請註銷陞階代弟贖罪上加恩著毋庸註銷特免廉保發遣四月賊入安徽踞六安州勝保督馬隊分路鈔擊賊率大股搶過河西分撲鳳凰橋等處營盤督兵擊退之五月授鑲黃旗蒙古都統時鳳陽府縣均陷賊上命會同督辦三省剿匪事宜太僕寺卿袁甲三迅圖克復六月進攻懷遠毀城外賊壘七月復授欽差大臣督辦安徽軍務皖省各軍均歸節制八月廬州踞匪竄至定遠復暗襲池河官軍連敗之勝保奏



請留兵防剿並派大員督率上命徐廣縉統帶隨同辦理九月匪竄踞天長圖北竄並分股撲三河集勝保派兵馳至高橋遇賊接仗復督親軍直抵三河匪悉數南遁三河集地方肅清十月進攻天長分三路直抵城下約投誠之李昭壽爲內應遂克之復以李昭壽獻滁州功奏請獎勵得旨李昭壽著更名李世忠以參將補用又奏皖省軍務較繁請添派帶兵大員幫辦上命李續賓幫同督辦又奏投誠人衆宜分別留營遣散請量爲安置允之九年二月奏請飭部剔除卹典積弊略曰軍興以來凡疆場死事之臣無論大小文武員弁以及紳民士庶一經統兵大員或地方大吏奏到罔不立荷恩綸優予卹典恩至渥也無如內外大小衙門胥吏舞弊需索重費或經部議行查本籍而孤寒無費可圖司道延不上報或家屬自行呈請到部而費用未饜所欲書吏遂藉以居奇是賜卹之恩施幾同捐納捐軀之忠蓋竟等鴻毛惟有請旨飭部妥議章程嚴定查辦限期定予遲延處分凡遇有仍前索費舞弊者准陣亡家屬指名控告重治其罪庶可除積弊而慰忠魂下部議行三月賊糾集安慶悍黨圍護城營盤勝保親督大隊馳救護城營內官軍同時並出內外夾擊殲賊無算立解重圍遂移營殷家橋懷遠首龔得糾

衆來撲官軍分路迎擊大敗之四月進剿六安盡毀附城賊卡乘夜環攻填濠直上克之擒首張元龍率衆乞降獻鳳陽府縣兩城並收復臨淮關勝保奏請優加獎勵以爲自拔來歸者勸得旨張元龍免其治罪並賞給三品頂帶花翎以都司卽補自六安克復後敗匪紛竄官軍跟蹤追擊直抵霍山北面隨收復霍山乘勝攻克滄南賊墟及介溝賊墟十餘處六月以賊竄盱眙自請嚴議上加恩改爲交部議處遂進攻盱眙克之九月丁母憂命俟軍務完竣再行回京穿孝賊沿淮下竄官軍擊敗於清水鎮斬首逆吳如孝等賊披靡南遁官軍仍還剿懷遠令水師直薄城關復懷遠縣城十一月復奏懇回京穿孝九之十年正月以未能克復廬定致匪蔓延撤欽差大臣命馳往河南督辦剿匪事宜復經御史林之望參劾降爲副都統二月授鑲藍旗漢軍副都統時擒匪竄禹州另股竄西平等縣五月諭曰勝保督辦河南剿匪事宜本年春間皖匪擾及豫省未能出省防堵任令匪蹤深入近省各屬多被蹂躪迨逆衆回巢始赴歸陳防堵實屬畏葸無能有負委任著卽來京以三品京堂候補七月到京八月授光祿寺卿十一月管理圓明園八旗內務府包衣三旗事務十一年正月授兵部右侍郎三月逆擒竄擾山東命馳

赴直隸景州山東德州一帶督辦防剿事宜五月進攻邱縣賊巢並濮頭老巢匪  
出大股來援擊敗之乘勝攻克館陶縣城並毀清水鎮老巢餘匪退踞冠縣各村  
官軍進攻毀七里村並附近各賊壘遂復冠縣城進擣莘縣並克之逆首宋景詩  
率衆投誠勝保責令隨同大軍進攻連克朝城觀城兩縣六月命督辦河南安徽  
剿匪事宜陸續拏獲結會謀逆各匪首並解散山東范縣各匪河北一律肅清得  
旨優敘七月穆宗毅皇帝登極十月勝保疏言朝廷政柄操之自上非臣下所得  
專自文宗顯皇帝龍馭上升皇上嗣位聰明天亶尙在冲齡全在輔政得人方足  
以資佐理如怡親王載垣鄭親王端華非不宣力有年然而赫赫師尹民具爾瞻  
今竟以當秉政鉅任攬君國大權以臣僕而代綸音挾至尊而令天下實無以副  
寄託之望而鑿四海之心在該王等不過以承寫硃諭爲辭居之不疑不知我皇  
上纘承大統天與人歸原不以硃諭之有無爲重至贊襄政務一節則當以親親  
尊賢爲斷不當專以承寫爲憑何也先皇帝彌留之際近支親王多不在側仰窺  
顧命苦衷所以未留親筆硃諭者未必非以輔政之難得其人以待我皇上自擇  
而任之以成未竟之志也今嗣聖既未親政皇太后又不臨朝是政柄盡付之該

王等數人其託諸掣簽簡放請鈐用符信圖章在該王等原欲以此取信於人無  
如人皆不信民暑可畏天下難欺近如御史董元醇條陳四事極有關繫應准應  
駁惟當斷自聖裁廣集廷議以定行止乃徑行擬旨駁斥已開矯竊之端大失臣  
民之望命下之日中外譁然政柄下移羣疑莫釋道路之人見詔旨皆曰此非吾  
君之言也非母后聖母之意也一切發號施令真偽難分衆情洶洶咸懷不服夫  
天下者宣宗成皇帝之天下傳之文宗顯皇帝以付之我皇上踐阼者也昔我文  
皇后當國雖無垂簾之明文而有聽政之實用爲今之計非皇太后親理萬幾召  
對羣臣無以通下情而正國體非特簡近支親王佐理庶政盡心匡弼無以振綱  
紀而順人心惟有籲懇皇上俯察芻蕘卽奉皇太后權宜聽政二聖並崇而於近  
支親王中擇賢而任仍秉命而行以成郅治宗社幸甚臣民幸甚奏上上命王大  
臣等會議十一月授鑲黃旗滿洲都統轉左侍郎進剿教匪楊幅凌等攻破延家  
營老巢生擒逆首延輪等教匪劉呂老等窮蹙乞降十二月督軍截剿竄豫逆捻  
同治元年正月兼正藍旗護軍統領二月逆匪陳大禧糾合各路逆捻來撲官軍  
前營旋擊退之以投誠勇日宋景詩率衆逃遁不卽行奏報上責其意存迴護革

職留任三月督軍進援潁州圍立解上嘉其調度有方加兵部尙書銜並賜珍物  
四月攻克廬州府城首逆陳玉成逃竄壽州勝保開城誘賊遂生擒陳玉成及僞  
王僞官等二十餘人時陝西回匪滋事圍省城六月授欽差大臣督辦陝西軍務  
八月由臨潼抵斜口匪分股來迎勝保命更番輪戰賊潰灞橋一帶賊匪亦望風  
逃遁官軍直抵西安城圍立解上命妥辦甘肅毗連陝西一帶防剿事宜閏八月  
剿辦咸陽回匪擊敗竄撲子午谷口川匪時光祿寺卿潘祖蔭順天府府丞卞寶  
第御史丁紹周華祝三先後奏參勝保冒餉納賄擁兵縱寇各款河南巡撫嚴樹  
森復疊次奏參其欺罔貽誤上命欽差大臣科爾沁親王僧格林沁將被參各款  
查明入奏嗣山西巡撫英桂西安副都統德興阿查復入奏諭曰勝保在皖豫督  
兵時經嚴樹森袁甲三疊次奏劾其荒淫貪縱朝廷以軍務方殷暫緩查辦且擢  
任統帥宜如何感激奮勉力圖報效乃任性驕縱濫耗軍餉糧臺設立雜支局糜  
費浮於正項收受劣員金安清賄賂軍營保舉各員俱令拜認門生餽送贄敬並  
攜帶妻妾赴陝到處攜妓隨營縱容家人丁祥捐納道員委用私人張仙保等在  
周家口抽釐便於肥己由河南赴陝時需索地方多金並諱敗爲勝捏報大捷多

次任用劣員戴鸞翔竇型等收受奉旨拏問之營員施鵬等餽送筭給差使將拏獲從逆之馬承恩索銀釋罪又於營中雜蓄優伶收留回婦及民間婦女其尤甚者認逆首張澐之妻爲義女並收納逆首陳玉成之妻爲妾陳玉成之弟二人因餽送銀兩擅將伊免死優伶冒充親軍按月提銀三千兩以致各營枵腹荷戈疊經損失種種膽大妄爲實出情理之外著傳旨革職拏問交刑部治罪並將該革員京寓貲財查鈔其陝西軍營侵吞餉項卽著多隆阿嚴密查鈔家人丁祥一併提訊究辦二年正月西安將軍安穆騰阿陝西巡撫瑛棨奏請派勝保剿辦直隸軍務上怒其朋比切責之三月御史吳台壽又奏稱勝保有克敵禦侮之功無失地喪師之罪上責其荒謬誕妄褫台壽職御史趙樹吉尋參其罪狀昭著雖置重典無以蔽辜請特申宸斷以正刑章上命派審王大臣切實根究質證明確按律定擬尋諭曰前因中外諸臣奏參勝保貪污欺罔各款復派議政王軍機大臣大學士會同刑部審訊經王大臣等將勝保親供呈覽於被參各款恃無質證一味狡展而於攜帶姬妾隨營則業已承認不諱本日復據王大臣等陳奏勝保所遞親供及訴呈各一紙更堪詫異勝保於督兵入陝之初人言藉藉朝廷不惜諄切

訓誨至再至三乃入陝以後仍復肆無忌憚怙惡不悛卽其所自認攜帶姬妾一節已屬大干例禁苗沛霖性情陰鷲勝保極口保其無他且擅調其練衆入陝今苗沛霖已戕官踞城肆行背叛宋景詩以反覆降匪經勝保代爲捏報戰功保至參將後又在陝擁衆背叛是今日苗宋二逆之糜餉勞師皆勝保養癰貽患所致而勝保之黨護苗宋二逆不得謂無挾制朝廷之意至其餘被參各款前經僧格林沁覆奏派員查訪並諮詢地方所稱情形大略相同是勝保貪污欺罔實天下所共知豈能憑其自行迴護之詞信爲絕無其事乃據勝保本日所遞訴呈內博引律例妄欲將原參各員治以誣告之罪尤屬飾非亂是膽大妄爲卽立正刑誅亦屬咎所應得特念其從前剿辦髮捻有年尙有戰功足錄勝保著從寬賜令自盡所有案內人犯著刑部分別提審訊明奏結以清積牘

清史列傳卷四十七終  
 前文有... 後文有... 卷四十七終